

مجدي مرعى

إحلم يا جحا

و

خليك مكانى

مسرحيتان

الطبعة الأولى يونيه 2021

بطاقة الكتاب

عنوان المؤلف	إحلم يا جحا و خليك مكانى
المؤلف	مجدى مرعى
التصنيف	مسرحيتان
رقم الإيداع القانونى	13463 - 2021
الترقيم الدولى	978-977-999-010-1
رقم الإصدار الداخلى	الطبعة الأولى يونيه 2021
عدد الصفحات	صفحة
تصميم الغلاف	مؤسسة النيل والفرات
المراجعة والتدقيق	الشاعر / محمد عبد العزيز عطية

جميع حقوق الطبع والنشر محفوظة للمؤلف، ولا يحق لأى دار نشر طبع ونشر وتوزيع الكتاب أو ترجمته أو الإقتباس منه أو نشره على النت الا بموافقة كتابية وموثقة من المؤلف

مؤسسة النيل والفرات للطبع والنشر والتوزيع

ثورة مصرية تشرق إبداعاً على الوطن العربي

رئيس مجلس الإدارة

ناجى عبد المنعم



مؤسسة
النيل والفرات
للطبع والنشر والتوزيع
أسسها الشاعر ناجى عبد المنعم
حائز 2017

رخصة مزاولة مهنة: 58365 - سجل تجاري: 13242 / 2017 - بطاقة ضريبية: 35-01-572
 عضو عامل باتحاد الناشرين المصريين رقم 941 لسنة 2018
 هاتف: 01011256943 - 01116202218 - 01202541192 - 020554372901
 الفاكس: 01202541192
 البريد الإلكتروني: nagyegy200064@gmail.com
alnilwaalfourat@gmail.com
 الفيسبوك: [alnilwaalfourat](https://www.facebook.com/alnilwaalfourat)
 تويتر: [alnilwaalfourat](https://twitter.com/alnilwaalfourat)
 الموقع الإلكتروني: www.alnilwaalfourat.com
 المقر الرئيسي: ج.م.ع محافظة الشرقية - العاشر من رمضان - مجاورة 13 - أمام سنتر الـ 13 - عقار 304



اهداء

سمعاً وطاعة رفيقة دربي
ونبض قلبي، ونداء أفكاري
إليك كل ما أسـطـره

و

لكل من هم نور يداعب حنايا الوجود
لكل من يصافحون قلوبنا المرهفة
ويهدوننا ضحكات صادقة.....

لهم

جميعاً باقات ورد وحدائق ود

الحادث والمتغير في نصيّ عالم الإعاقة..

احلم يا جحا وخليك مكاني لمجدي مرعي

بقلم / أحمد زحام

يحتل المسرح مكانة بارزة في عملية تنشئة الأطفال، فهو يستطيع أن يلبي احتياجاتهم النفسية، ويسهم في إشباع اهتماماتهم العقلية، ويربي أذواقهم، ويصقل مشاعرهم وإحساساتهم، ويمكنهم من التصدي للحياة ومتغيراتها بإيجابية ووعي، لذا.. فعلى الكاتب أن يتوافر لديه عنصر قوة الأسلوب.

فقوة الأسلوب: تتمثل في المثيرات أو المنبهات التي توظف أحاسيس الطفل ومشاعره وتحرك وعيه وخياله، وتحفزه على التأمل والتناغم والتوافق مع الفكرة المقدمة.. ولا ريب أن استعمال الكلمات المعبرة والعبارات القصيرة الواضحة و الثرية بالمعاني والأفكار.. وإطلاق الصفات الخاصة ذات التأثير الانفعالي في الطفل والدقيقة بعيداً عن الصفات العامة المألوفة وتحاشي ما يبلبل الذهن ويُعثر عملية القراءة - هذه العناصر تمنح الأسلوب قوة، و تساعد على استثارة اهتمام الطفل المتلقي وجذبه و مشاركته، وأن يكون هناك تكامل بين الشكل والمضمون.

وهذا التلاؤم أو التكامل بين الشكل والمضمون يجب أن يتوفر في مسرح الأطفال وفي مسرح الكبار على السواء، ولكن مسرح الأطفال يتميز كذلك بضرورة مراعاة جمهور الأطفال الذي يختلف عن جمهور الكبار في المستوى العقلي والنفسي واللغوي، ولهذا السبب يشكل مسرح الأطفال ظاهرة مركبة ترجع للإزدواجية الكامنة فيه فهو - أي أدب الأطفال - حريص على توفر البعد الفني الأدبي من جهة، وكذلك البعد التربوي - النفسي من جهة أخرى.

نحن أمام نصيّ (احلم يا جحا - وخليك مكاني) للكاتب المسرحي/ مجدي مرعي، وفي الواقع أنه.. لا تعد هاتان المسرحيتان هما العمل الأول للكاتب.. بل له العديد من المسرحيات التي كتبها، وأوجد شخصها على خشبة المسرح قراءة وتمثيلاً

كما قدّم دراسات نقدية في هذا المجال، فأصبح لديه حالة تراكمية من المعرفة والتعلم الواقعي خلال أدوات مواجهة المتلقي. كما أنه خص الطفل بكثير من هذه الأعمال، وأيضاً اقتحم عالم ذوي الإعاقة، ولكل مجال حديث تطبيقي عن هذه الأعمال.

الكتابة للطفل من خلال المسرح

تعد الكتابة لمسرح الطفل من أصعب آليات الكتابة للطفل لأهمية كل عنصر من عناصر المسرحية:

1- اللغة:

البساطة في لغة نص مسرح الطفل، وهذا الأمر يتطلب من الكاتب استخدام لغة غير معقدة أو مبهمّة، ومنسجمة مع قدرات الأطفال اللغوية، من أجل الفهم المباشر للنص المسرحي، بل من أجل الاندماج والتواصل معهما أيضاً، دون اللجوء إلى السطحية وقد استخدم المؤلف اللغة العامية وهي اللغة الدارجة عند العامة، اللهجة المتداولة اليومية، وهي سهلة الفهم وأقصر الطرق للمخاطبة، ثم يأتي بعد دور اللغة المستخدمة التي تناسب الطفل..

2- الحوار:

تعتمد المسرحية على الحوار، والحوار الجيد في مسرح الطفل هو: الحوار الواضح بلا زيادة، وعباراته مختصرة، وكلتا المسرحيتين اعتمد فيهما المؤلف على تباين الشخصيات وتنوعها كما في مسرحيته (احلم يا جحا)، فأوضح لنا الفارق بين القاضي وجحا في اللغة الحوارية وطبيعة الشخصيات.

3- الحكاية:

إن حب الطفل للحكايات ميل طبيعي، والتزام كاتب مسرح الطفل بها ضرورة واجبة، بحيث تكون الحكاية واضحة، بسيطة جاذبة، والنصان المذكوران ليس بهما أية تعقيدات درامية، بل جاءت الأحداث متسلسلة طبيعية، لا يشعر الطفل بغربة في أحداثها. في مقدمة كل نص مسرحي.. كتب المؤلف أن النص لذوي الإعاقات، ففي نص جحا كتب (مسرح متحدي الإعاقة)، وفي مسرحية خليك مكاني (ذكر بأنها قُدمت في مهرجان الإبداع للمعاق ذهنيًا)، وهذا يجعلنا.. نشعر بوضوح أننا أمام نصين للأطفال يشارك فيهما المعاقون.

ومسرح الطفل المعاق يحتاج منا الإنتباه له...

أولاً: لأنه شديد الخصوصية.

ثانياً: لأنه يحتاج إلى معالجات نفسية.

ثالثاً: لأن هناك عدة خطوات يجب أن تتبع في هذا المجال

وأولها فهم طبيعة الإعاقات التي نتعامل معها، والفروق الموجودة بين الأطفال المعاقين.

لذا... علينا أن نستعرض:

أولاً: تلك الخصوصية:

ففي المسرح فرصة سانحة للاقتراب أكثر من هموم المعاقين، والتعاون معهم بما يخدم تطلعاتهم وطموحاتهم مؤكدين على أهمية المسرح في نقل وجهات نظر أصحاب الإعاقة بقلب فني يزيد من تأكيد حقوقهم الاجتماعية، ويؤكد على الإعراف بهم على نطاق أوسع، وإعطائهم مساحة أكبر للتعبير عن ذواتهم، وإنضاج مشاعرهم إلى أقصى مدى، والإعتماد بالكامل على الممثل في إيصال مشاعره إلى أقصى مدى، والتخلص من الكليشيهات المحفوظة والمكررة، بالإضافة إلى التقشف في الديكور والإضاءة لعدم تشتيت المشاهد، وضمان تفاعل المشاهد مع الأداء المسرحي.

ثانياً: وان كان للبعض رأي في هذا اللون من المسرح فسوف يرى أن مسرح المعاقين هو مسرح نفسى، الأول يهتم أكثر بالتربية، والأخير يهتم أكثر بالعلاج، ولهذا سمي بالسيكو دراما (Psychodrama) السيكو دراما تمثيلية تستخدم الأدوات التي تستخدم في فن المسرح، ويستعان بها في العلاج النفسى، فالسيكو دراما فن من ناحية، وطب من ناحية أخرى وبعض الباحثين يعتبرها شكلاً من أشكال المسرح كما فعل مورينو، وهو أول من استخدم السيكو دراما، والبعض الآخر يعتبرها شكلاً من أشكال الطب النفسى.

والشأنك في هذا المسرح أنه مسرح يتم التعامل معه بالمقطعية، فلا يوجد رابط أو مفاهيم معينة أو قواعد يتم الاعتماد عليها في معالجة تلك النصوص.

وتشير الأرقام إلي أن الإعاقة الفكرية (التخلف العقلي) تمثل مركز الثقل في عدد ونسبة المعاقين – وفق بيانات 1996- حيث تصل إلى أكثر من مليون ونصف معاق بنسبة حوالي 73% من إجمالي المعاقين، يليها الإعاقة الحركية بنسبة 14.5%، ثم الإعاقة البصرية والإعاقة السمعية بنسبة 12.5%.

كما تشير إلى أن أعلى نسبة لتقديرات نوع الإعاقة كانت في الإعاقة الذهنية البسيطة بنسبة 2.5% من إجمالي عدد الأطفال في المجتمع، يلي ذلك ذوو صعوبات التعلم بنسبة 1% من عدد الأطفال والاضطرابات الإنفعالية والوجدانية، ثم إعاقة التخاطب الجزئي بنسبة 0.95%، فالتخاطب الكلي بنسبة 0.63%، ثم الإعاقة الحركية والتخلف العقلي الشديد بنسبة 0.5%.

ففي مسرحية (خليك مكاني).. يقدم الكاتب هذا النموذج من خلال شخصية عبد ربه ذلك الطفل المعاق ذهنياً، الذي يأخذنا إلى ذلك العالم المليء بالمتناقضات من خلال رحلته داخل المسرحية.

إن الإعاقة ليست مانعاً من الاندماج، وإن الفن لا يتعارض مع الأهداف الاجتماعية إذا أحسننا تقدير الأمور وعرفنا كيف نعدّل أساليبنا ونستجيب للحاجات والظروف المتغيرة، بحيث نضع متطلبات الإنسان المعاق فوق كل اعتبار.

وفي مسرحية (احلم يا جحا) قدم شخصيات (فرحان: قزم - سعيد: قزم - عوكل: معاق سمعياً - نوفل: معاق سمعياً - جاسر: معاق حركياً - خميس: معاق بصرياً - جمعة: معاق بصرياً - ياسميناً أو أحلام: معاقة بصرياً - كريم: معاق ذهنياً - باسم: معاق ذهنياً).

وفي مسرحية (خليك مكاني) عبد ربه: معاق ذهنياً

تواجه العديد من النصوص المسرحية بعض الإشكاليات في تقديمها على خشبة المسرح خاصة إذا كانت تحظى بالعديد من الإعاقات المختلفة، فلا يكلف المخرج نفسه في البحث عن شخوص الإعاقات وتقديمها كوجوه مسرحية على خشبة المسرح، فيلجأ إلى الشخوص العادية في تقديمها بدلاً عنهم ويعتبر هذا ظلماً بيناً للنص وللمعاقين أنفسهم، فهذا.. معناه إقصاؤهم عن المشهد المسرحي.

ويبحث الكاتب عن فكرة العدالة في نص (احلم يا جحا) من خلال البيئة التي يتحرك داخلها في اطار كوميدي، وفكرة المساواة في نص (خليك مكاني).

وقد استطاع المؤلف أن يتعرف على شخصياته المتنوعة التي يقدمها عن كثب، خاصة في نص (احلم يا جحا)، ولكنني أتساءل: هل يجب على الكاتب أن يكتفى بذلك فقط؟ لا.. بل عليه أيضاً - أن يتعرف على الجمهور المخاطب.

فأديب الأطفال.. وخاصة كاتب مسرح الطفل ينبغي أن يتعرف إلى جمهور الأطفال، وأن يحيط بهذا العالم الغريب، مع الرغم أن الإحاطة التامة تظل أمراً عسيراً لأن ما يكتبه - شكلاً و مضموناً - يخضع لطبيعة هذا الجمهور وخصائصه، ولا يكفي أن يتعرف الأديب إلى عدد من الأطفال سواء أكانوا أبناء أم أبناء جيرانه أم تلامذته ... بل ينبغي أن يدرس جمهور الأطفال دراسة علمية معتمداً على ما توصل إليه رجال التربية وعلم النفس، و لا يكفي أن يعرف كاتب مسرح الأطفال جمهوره، بل عليه أن يحترمهم.. وأن يحبهم...

وأخيراً تعددت الأركان التي يعمل عليها المؤلف داخل نصوصه، وإن تزامنت مع شخوصه، إلا أننا أمام نصين يحتاجان منا القراءة.

أحمد زحام

قاص و كاتب مسرحي

** ** *



صبغة جديدة لمسرح ذوى الإعاقة –

للكاتب / مجدى مرعى

بقلم / رجاء محمود

أثرى الكاتب والمؤلف المسرحى الحياة المسرحية قرابة أربعين عاماً متنقلاً بين فنون المسرح تمثيلاً وتأليفاً وإخراجاً سواء أكان ذلك فى الثقافة أو فى الجامعة أو فى الشباب والرياضة أو فى المسرح المدرسى وغيرها من الجهات التى قدم من خلالها أعماله المسرحية.

إن "مجدى مرعى" المؤلف.. قد شغف بكتاباته المسرحية لمسرح الطفل حيث أولاه اهتماماً خاصاً، فنجده يصدر من تأليفه أربعة كتب مسرحية ضمت مسرحيات للطفل وهى: (زيارة إلى مدينة الأحلام - عرايس قماش - حيوانات.. لكن – لعب x لعب)، وغيرها من الأعمال الأخرى تحت الطبع... ويزداد شغفه بالكتابة أكثر ليعرج إلى منحى آخر، ليؤكد لنا أن نهمة للكتابة لا ينضب.. فها هو يطرق الباب ليدخل إلى عالم آخر لا يقل أهمية عن مسرح الطفل، ألا وهو مسرح "ذوى الإعاقة"، فنجده وبروح المثابرة يقترب منهم ويعيش معهم، ويندمج معهم ويتفاعل بهم، ويتعرف على قضاياهم وهمومهم، ليقدم لنا فى النهاية هاتين المسرحيتين اللتين بين أيدينا الآن.. وهما " احلم يا جحا " و"خليك مكاني".

ولقد أثير " مرعى " بما رآه فى عالم ذوى الإعاقة من عزيمة وإصرار وتحدي، ومواجهة الواقع، مما جعله يقدم على كتابة عدة نصوص لمسرح ذوى الإعاقة، وكان من أهم دوافعه أن يتقبل المجتمع ذوى الإعاقة بشكل أكثر، ومن ثم.. فهو يدفع المجتمع للمضي بخطوات واسعة نحو تحقيق كل ما يحلمون به برغم كل الجهود المبذولة من قبل مؤسسات الدولة لدمجهم داخل المجتمع، والإقرار بحقوقهم التى تضمن لهم حياة كريمة.

والنص الأول " احلم يا جحا " يحمل عدة إطروحات وركائز أساسية اعتمد عليها الكاتب فى كتابته.. ومنها استعراضه لقضايا وهموم ذوي الإعاقة بشكل إنساني رائع بعيداً عن الشفقة والإستعطاف، لذلك لم تكن كتابته مجرد انعكاس لوجهات النظر السائدة فى المجتمع، بل نجده يسعى لطرح رؤى جديدة للمساهمة فى تغيير الواقع، وتأكيد لمبدأ " تقبل الآخر " والتعامل مع كل فرد من أفراد الإعاقة باعتبار أن كل واحد منهم يمثل واحداً صحيحاً.. لا كسراً، والركيزة الأخرى هي وضع المادة الدرامية فى قالب كوميدى، اتسم بالمنطقية فى الأحداث لكي يستطيع أن يتفاعل معه عقل ووجدان المشاهد، وليأخذ الكاتب القسط الكافي والبراح لطرح لكل ما يريد من قضايا دون كلل أو ملل... ولعل من أبرز الركائز التى اعتمد عليها هذا العمل هي أنه جمع عدة أنواع متعددة من الإعاقات شملت السمعية والبصرية والذهنية والحركية والتقرم... وهذه حمولة تضيف للنص المسرحي — عمقاً وجمالاً — وبراعة فى التعبير مما يفتح المجال للمتلقى بأن يشعر بكل إعاقة ومشاكلها وقضاياها تجاه المجتمع، وكما هو المعتاد فى كتابات " مجدى مرعي " بأنه يوظف التراث فى كتاباته والمتمثل فى استحضاره لشخصية " جحا " التى اشتهرت بالطرف والنوادر الضاحكة التى اتسمت بالذكاء وحسن التصرف، وهذا ما استعان به كاتبنا هنا، ليفجر من خلاله قضاياها فى نسيج كوميدى خفيف الظل.

ويؤكد "مجدى مرعي" فى ثنايا النص المسرحي بأنه ليس من شروط الإعاقة ؛ ضرورة فقد حاسة من الحواس التى تستوجب الدخول فى مضمار " الاحتياجات الخاصة"، فهذا المصطلح الأخير هو مظلة تشمل ذوى الإعاقة، وغير ذوى الإعاقة... فهناك أفراد يمتلكون كل حواسهم، لكن يعوزهم احتياجات نفسية كاحتياجهم للأمن، والحب والرعاية والاهتمام.. لذلك كان التعبير " ذوى الإعاقة " هو التعبير الأصوب وهو التعبير الأدق علمياً، لذا لجأ إليه الكاتب كعنوان للكتاب.



وانتقالاً للنص الآخر " خليك مكاني " فسنجده أنه نص مسرحى موجّه لذوي الإعاقة الذهنية، وهو قائم على فكرة " الصديق الأمثل " وفيها يقوم الصديق المعافى بمصاحبة الصديق المعاق ذهنياً للرفع من قدراته وتعليمه بعض السلوكيات والمهارات الأساسية التى يواجه بها المعاق ذهنياً الحياة، كتعلم بعض المهن البسيطة كالنجارة وأعمال الدهان وغيرهما ليخلق منهم فى النهاية قوة منتجة بدلاً من ان يكونوا عالة على المجتمع علاوة على ربطهم بسوق العمل، إضافة إلى تعلمهم فنون الرسم والموسيقى وغيرهما، وهذه الفكرة قامت بها حركات تطوعية لمنظمة دولية عمدت على تحقيق التنمية المتكاملة للفرد، وقد التقط الكاتب " مجدى مرعي " هذه الفكرة لتكون ركيزة أساسية لنصه المسرحي، ولتكن حلاً لفك خيوط الدراما التى تتجمع فى عقدتها من خلال حيكته الدرامية، ويكون ذلك وسيلة لرفع قدرات هؤلاء، وكان الأدعى لاستخدام فكرة الصديق الأمثل هو استنفاد كل الحلول للتعليم والرفع من كفاءة هؤلاء... وربط الكاتب باقتدار كل عناصر الدراما المقدمة بخيط آخر وهو استغلال هؤلاء أبشع الاستغلال فى التسول، وإدراج الأموال على أجليهم، بل عمل على رفع مستوى الخط الدرامي إلى أعلى درجة عندما حيكّت خطة لا إنسانية لاقتناص (كلية) أحد هؤلاء باعتباره شخصاً غير مكتمل، حيث كان هناك من هو أولى بهذا الجزء ليستكمل حياته.

ومن خلال هذا الاستعراض السريع نجد أنفسنا أمام كاتب مسرحى حمل على عاتقه هموم هذه الفئة، ويعبر عنها تعبيراً حقيقياً دونما أدنى افتعال ساعياً للإرتقاء بالإنسانية بكل صورها

رجاء محمود

إعلامية ومخرجة مسرح

** ** *

" احلم يا جحا "

الشخصيات

- جحا
- القاضي
- الحارس
- الزوج
- الزوجة
- جارة 1 - السلطانة
- جارة 2 - مرجانة
- جار 1 - السلطان
- جار 2 - جحا
- من الصالة : طفل
- من الصالة : شخص ما
- فرحان : قزم
- سعيد : قزم
- عوكل : معاق سمعياً
- نوفل : معاق سمعياً
- جاسر : معاق حركياً
- خميس : معاق بصرياً
- جمعة : معاق بصرياً
- ياسميننا : معاقة بصرياً، وهى نفسها أحلام
- كريم : معاق ذهنيّاً
- باسم : معاق ذهنيّاً



(الفصل الأول)

الزمان : في عصر لحفيد من أحفاد جحا، الذي يرجع نسبه لجده
الأكبر جحا الفيلسوف والحكيم

المكان : في قاعة محكمة، حيث نجد في العمق منصة القاضي
وإلى يسارها قفص المتهمين، وإلى يمينها بعض
المقاعد المعدة للحضور، وقد جلس عليها جمع من
الناس ما بين.. شيوخ، وشباب، وأطفال، ونساء، وقد
ظهر عليهم جميعاً علامات الإستياء، والملل من طيلة
الانتظار)

(ضجيج وصخب من جمهور الحاضرين)

الزوجة : (لزوجها) إمتي القاضي يبجي عشان يخلصني منك
بقى؟ أنا خلاص قرفت منك ومن عيشتك

الزوج : يخلصك منى؟! ماشي يا فتكات، إن ما فكيتك، وخليتك
فتكة واحدة، ما ابقاش أنا

الزوجة : ده بقى لو قعدت على ذمتك، بقى يا راجل، تخوني مع
صاحبتي، وجارتي!.. أتاريك كل ما تيجي عندنا عنيك
ما بتتنشال من عليها، يا ابو عين زايغة.

الزوج : محصلش، محصلش، قدامى يا فتكات ع البيت..

الزوجة : إنت مفكرني جاية هنا أتفسح؟.. أنا جاية عشان أتطلق
(تتركه) عن إذك..

الزوج : (يجرى مهرولاً خلفها).. طب وأولادنا فلذات أكبادنا؟!!

- الزوجة : أنا جاية أتطلق وبس، وخير الطلاق عاجله..
- الزوج : كده؟، عامة على الباغي تدور الدوائر
- الزوجة : (تضحك بسخرية) والمثلثات والبراجل
- الزوج : (بتوعد) ماشي يا فتكات
- جارة 1 : (لجارة 2) شوفي بقى نص البيض اللي عندك ده من حقي
- جارة 2 : حقك إزاي؟ والفراخ اللي بتبيض كلها بتاعتي
- جارة 1 : فراخك آه، بس البيض اللي عندك، أنا ليا فيهم النص وده بقى الحق المستحق
- جارة 2 : يا عالم يا ناس... عقلي ح يطير من نافوخي
- جارة 1 : يطير ولا ما يطيرشي يا اختي، وأنا مالي، أنا ليا نص البيض، وبس
- جار 1 : (لجار 2) أفلع سروالي يا حرامي..
- جار 2 : أنا حرامي يا نصاب، أفلع لك سروالي بتاع إيه؟ أنا اللي مشتريه..
- الزوج : (لجار 1) يعنى مقدرتش تقلعه السروال بره، جاي تقلعه السروال هنا في المحكمة وقدام الستات كمان؟
- جارة 1 : حقه.... اللي اختشوا ماتوا
- جار 1 : (لجار 2) يا نصاب يا حرامي يا لص (بتوعدة) حاضر استنتي بقى لما ييجي جناب القاضي

- الحارس : (داخلاً، وممسكاً جحا) بس منك له، إيه الدوشة دي؟
- الزوجة : (للزوج) يا عالم يا ناس طلقوني منه
- جارة 1 : (لجارة 2) وأنا مش ح اتعتع من هنا، إلا لما آخذ نص البيض
- جار 1 : (لجار 2) وأنا مش ح امشى من هنا إلا ما أفلعك السروال
- جارة 1 : ثاني
- الحارس : (يصرخ فيهم) قلت بس... القاضي جاي وكل واحد ح ياخذ حقه
- (لجحا) ادخل يا عم جحا.. معرفش إيه اللي جراك...
(الجميع يهيمهمون باندهاش)
- جار 1 : معقولة.. جحا يتقبض عليه، وييجي هنا المحكمة؟
- الزوج : جحا طول عمره راجل فُكهي، والناس كلها بتحبه
- جارة 1 : أيوه يا خويا الناس كلها بتحبه، حتى أنا كمان
- الزوج : (لجارة 1) وأنا كمان بحبه
- الزوجة : (للزوج) إيه يا راجل؟ مش تختشي على دمك؟ مراتك واقفة قدامك، والسنارة عمالة تغمز (لجارة 1) حقة.. البجاجة ليها ناسها
- جارة 1 : (للزوجة) أنا بجحة برضه يا آخر فرز الستات؟
- الزوج : (لجارة 1) يا ستي ما يصحش كده (للزوجة) مش لما أخلص من التهمة الأولانية.. أروح للتهمة الثانية..

جارة 1 : (وقد سمعت حديثهما) أنا تهمة برضه؟، طب و حياة
أمي، لأشتكيكم للقاضي

الزوج : لا والنبي و حياة أبوكي، أبوس على دماغك

الزوجة : (تصرخ) وتبوس كمان!!

الحارس : بس منك له (لجارة 1 بإعجاب) لوها (للزوجة زجراً)
لها

جارة 1 : (تضحك بميوعة)

جار 1 : جحا اللي عايش طول عمره في نوادره، وطُرفه
وحكاياته، يشرف هنا المحكمة؟

جحا : أعمل إيه بس؟ حظي كده.. بس كل عقدة وليها حلال

الحارس : (لجحا) إيه بتفكر في حيلة جديدة؟

جحا : هو إنت مديلي فرصة افكر؟

الحارس : وعلى ما تفكر يكون القاضي طسك حكم إعدام

جحا : قال الله ولا فالك، تف من بقك

الحارس : (يبصق على وجه جحا.. الجميع يضحكون)

جحا : (يمسح وجهه) بقولك تف من بقك، مش تنف عليا

الحارس : أنا بنفذ الأوامر

جارة 1 : (بأداء إيقاعي) على طول.. على طول؟

الحارس : (بنفس الأداء) على طول.. على طول؟

- جحا : (بنفس الأداء) من غير تفكير
- الحارس : (دون أن يستشعر بجحا) من غير تفكير..
- الزوجة : (ناظرة للحارس) و ح تجيبه منين؟
- جحا : (بلهجة امرأة) حيث كده بقى، أنا بأمرك تسييني أخرج
- جار 2 : أيوه.. أأمره يا جحا.. خش فيه جامد يا جحا
- الحارس : (بخشونة أكثر) أنا بنفذ الأوامر اللي جاية من فوق
- جحا : (مفكراً) الأوامر اللي جاية من فوق !!
- الحارس : أي نعم
- جحا : ما ينفعش آه يا ني؟
- الزوجة : آه يا ني يا جوزي اللي راح منى
- جارة 2 : آه يا ني م البيض اللي ح يتاخذ منى
- جار 2 : آه يا ني يا سروالي
- الحارس : (لهم) بس (لجحا وملطفاً) الأوامر اللي جاية من فوق
واجبة التنفيذ
- جحا : (للحارس) من فضلك شيلني
- الحارس : حاضر (يرفع جحا)
- جحا : ده الوقت أنا بقيت فوق... من فضلك سيبني أخرج
- الجميع : (يضحكون)

الحارس : (يلقى بجحا أرضاً) أمر القاضي إني أجيبك هنا وأحطك في القفص ده

جحا : (بتأوه) آه يا ني.. آه يا ني يابا.. تفنكر القاضي ممكن يحكم عليا بإيه؟

الحارس : أقل حاجة

جحا : أيوه.. قول

الزوجة : خلينا في أقل حاجة

جارة 2 : قول وبلاش إعدام والنبي

الحارس : أقل حاجة؟

جحا : ثاني... قول

الحارس : أقل حاجة

جحا : أنا بأمرك إنك تقول... اتفضل قول

الحارس : أقل حاجة

الجميع : من فضلك قول، خلصنا

جحا : (يستحثه على النطق) هيه.. أبوس رجلك لتقول

الحارس : أقل حاجة

الجميع : ثاني!!

الحارس : أقل حاجة حكم الإعدام

جحا : (مصدوماً) الله يخرب بيتك

- الحارس : بتقول إيه؟
- جحا : ما بقولش
- جار 1 : (للحارس) روح يا راجل
- الحارس : (بنهره) بتقول إيه؟
- جار 1 : روح يا راجل.. وتعالى تاني
- جارة 2 : (للحارس) إلهى يا أخى يوقفلك ولاد الحلال
- الحارس : شكراً
- جارة 2 : (هامسة) اللي يودوك في داهية
- الحارس : (يدفع جحا داخل القفص، فيسقط على الأرض) إنت بقى تترزع هنا لحد ما يبجي القاضي
- جحا : يعنى أنا لوحدي بس، اللي ح ابقى جوه القفص؟
- الحارس : آمال إنت عاوز مين يونسك؟ ثم إن القفص ده لابق على مقامك العالي
- جار 2 : (باستهزاء) الناس مقامات يا جحا، بعدين إحنا عندنا كام جحا؟
- جارة 1 : واحد.. آه.. بس بمقام ميه
- الحارس : استلقى وعدك بقى يا فكيه.. القاضي ح يكون مركز معاك قوى ومش بعيد....

- جحا : (مقاطعاً) أرجوك متكلمش.. تف من بقاءك
- الحارس : ثاني!
- جحا : لا.. أرجوك.. هو القاضي ح يتأخر؟
- الحارس : القاضي في محكمة ثانية، بيصدر أحكام إعدام، أصل النهارده يوم الإعدام العالمى، عقبالك يا جحا، خلينا نخلص منك، ولو إنك هتصعب علينا قوى (متظاهراً بالبكاء) اللي زيك ما يتعوضش يا جحا (لنفسه) جاتكم البلاء والبلاء، هو احنا ناقصينكم؟
- جحا : (يتسمع الحارس) أنا بلاء وبلاء؟ (لنفسه ومتوعداً) حاضر إن م طلعتة على جبتك
- الحارس : بتقول إيه؟
- الزوج : سيبك منه يا جحا
- جار 1 : براءة بأذن الله
- جارة 1 : (بميوعة) كلنا بنحبك يا جحا
- الزوجة : حتى جحا مش عاتقاه
- جارة 2 : (تغيظ الزوجة) كلنا بنحبك يا جحا
- الجميع : كلنا بنحبك يا جحا
- جحا : هو انا جزاتي إني بضحك الناس !! طب ده الناس متقدرش تستغنى عنى

- جار 2 : أيوه صح.. ما نقدرش نستغنى عنك يا جحا
- جحا : ولو مكننتش أضحكهم مين يقدر يضحكهم؟ لما أموت
أو لما أتسجن
- الجميع : كلنا بنحبك يا جحا
- جحا : وأنا كمان بحبكم
- الحارس : ما هي دي الجريمة
- جحا : جريمتي إن الناس بتحبنني؟ !
- الحارس : إنت جمعت الناس حواليك
- جحا : الناس محتاجين اللي يخفف عنهم
- الجميع : يسلم بقك يا جحا
- جارة 1 : (بميوعة) يسلم بقك يا جحا
- الزوجة : ملكيش دعوة ببقه يا اختي.. بقه ده بتاعي
أنا...بيضحكني أنا
- الزوج : (ينهرها) إنتي بتقولي إيه يا وليه؟
- جحا : وأنا كل اللي بعمله إني بضحكهم.. بضحك الغلابة
والمطحونين
- الحارس : إنت بقيت مصدر خطر يا جحا
- الجميع : مصدر خطر!!

- جار 1 : مصدر خطر؟! وعلى مين؟
- جارة 1 : (بميوعة) جحا غلبان لا بيهش، ولا بينش
- الحارس : انتم صدقتم كلامي.. أنا كنت بضحك مع جحا
- جحا : أُمال إذا كان ده ضحك.. يبقى الجد إيه؟
- الحارس : (يضحك)
- جحا : (لنفسه) لما أنام شوية، يمكن معرفش أنام بعد كده
(لنفسه) تنام إزاي؟ وإننت ح يتحكم عليك الوقت
(لنفسه) إنت حتحير نفسك ليه؟ الخبر النهارده بفلوس،
بكرة يبقى ببلاش، علي رأى المثل: تبات نار تصبح
على خير(يصرخ) يا عالم يا ناس.. حد يقولي أنا
عملت إيه؟
- القاضي : (يدخل) أنا أقولك إنت عملت إيه..
- جحا : جناب القاضي!(الجميع يقفون تحية، وإجلالاً للقاضي
حيث يشير لهم بالجلوس)
- القاضي : (يتجه للمنصة) إيه آخر طرفك ونوادرك يا جحا؟
- جحا : طرف ونوادر !! هو ده وقته يا جناب القاضي؟
- الحارس : (يلكز جحا) قوله أي طرفة، يمكن يضحك، ويخفف
عنك الحكم

- جحا : (للحارس) إنت شايف كده؟
- الحارس : أيوه
- جحا : (للقاضي) ممكن تخلى الحارس يطلعني من القفص ده، وتسمح لي آخذ أى طفل من الصالة..
- القاضي : (للحارس) طلّعه من القفص يا حارس، وخذ اللي إنت عاوزه من الصالة يا جحا
- جحا : (يخرج من القفص، وينزل للصالة.. ثم لشخص ما) الطفل ده ابنك؟
- شخص ما : أيوه.. ابني
- جحا : ممكن أخذه؟
- شخص ما : اتفضل، خده خالص مش عاوزه
- جحا : (للطفل) تعالى معايا يا بابا
- الطفل : على فين يا عمو؟
- جحا : تعالى بس معايا، وح تتبسط (جحا يصعد المسرح مع الطفل)
- جحا : (للقاضي) ده الوقت الحارس ده، يعمل نفسه حمار
- الحارس : (بغضب شديد) أنا حمار؟!
- الطفل : أيوه.. إنت حمار (الحارس يتجهج على الطفل، والطفل يجرى منه)

- الزوجة : كده تمام
- جارة 1 : اشتغل يا جحا
- الزوج : ورينا نوادر ك يا جحا
- جارة 1 : (بميوعة) ربنا يفك عنك يا جججوتي
- جارة 2 : لا وإيه، الحارس ح يعمل نفسه حمار
- الجميع : (يضحكون)
- القاضي : (بطرق على المنصة لينصت الجميع) اللي ح يتكلم ح اطلّعه بره
- الجميع : (ينصتون)
- الحارس : أنا حمار؟ شاهد يا جناب القاضي؟
- القاضي : آه شاهد، نفذ الأمر يا حارس..
- الحارس : أمرك يا جناب القاضي (الجميع يضحكون ضحكات مكتومة)
- : (متوعداً جحا) حاضر يا جحا.. إن ما وريتك
- جحا : (للقاضي) ممكن تديلي العصاية اللي معاك يا جناب القاضي
- القاضي : مدام ح تضحكنا اتفضل (يعطيه العصا) بس رجعه تاني

- جحا : (للطفل.. ومشيئاً للحارس) اركب الحمار ده يا حبيبي
- الحارس : يركبني أنا؟!!
- جحا : أيوه.. مش إنت حمار؟
- الحارس : ماشي يا جحا.. اصبر عليا.. إن مطلعتة على جتتك..
- القاضي : وطى يا حارس.. قصدي وطى يا حمار.. عشان
الطفل ده يركبك
- الحارس : حاضر، حاضر يا جناب القاضي
- الطفل : (بفرح) الله، أنا ح اركب حمار، عشان خاطري
ياحوحو، أوعى ترفسنى
- الحارس : (للطفل وبغضب) فرحان قوى؟!!
- : (ينفذ أمر القاضي، ومتخذاً وضع الحمار للطفل)
اتفضل اركب
- الطفل : حاضر يا حمار
- الحارس : (ينهض غاضباً) حمار تاني !
- الطفل : وطى بقى يا حمار وبلاش دلح
- الحارس : (يتخذ وضع الحمار مرة أخرى ويمتطيه الطفل)
- جحا : (يضرب الحارس بالعصا) شيه يا حمار
- الحارس : (بتأوه)

- الجميع : (يضحكون)
- الزوجة : (تصرخ فيهم) ما ينفعش كده يا جماعة
- القاضي : هو إيه اللي ما ينفعش؟
- الزوجة : الحارس لازم ينهق
- القاضي : نهق يا حارس، نهق يا حمار، بس معقولة الطفل يركب الحمار ويستريح، وجا التعبان الشقيان يمشى هو إيه مفيش احترام للكبير؟
- جارة 1 : عندك حق يا جناب القاضي
- جحا : ولا تزعل نفسك يا جناب القاضي (ينزل الطفل، ويعطيه العصا ويركب الحمار — الحارس — ثم للطفل) امسك العصاية دي، واضرب بيها الحمار عشان يمشى
- الطفل : حاضر يا عمو
- الطفل : شي.. شي يا حمار (الحمار - الحارس - ينهق)
- جار 1 : معقولة يا جحا! إنت مش في قلبك رحمة، إنت تركب وتخلي الواد الصغير يمشى
- جارة 1 : (لجحا بميوعة) إنت قاسى خالص خالص يا جحا
- جحا : ولا تزعلوا نفسكم (للطفل) تعالى اركب ورايا يا حبيبي
- الطفل : (يركب خلف جحا على الحمار - الحارس -)

- جحا : شي يا حمار
- جار 2 : لا.. لا.. دي منتهى القسوة، جحا وابنه الاتنين راكبين الحمار ! فين الرحمة؟ فين الإحساس بألم الحيوان؟!
- جار 1 : صح.. فين الرحمة؟ فين الإحساس بألم الحيوان؟!
- جحا : (ينزل من على الحمار — الحارس — هو والطفل) ولا تزعجوا أنا والولد ح نمشي جنب الحمار
- الزوج : (يضحك) معقولة يا جحا.. أُمال إيه لزمة الحمار؟
- الزوجة : (تضحك) نركبه أو ناكله هم هم
- جحا : طب أعمل إيه؟ يعنى لا كده نافع، ولا كده نافع.. إيه رأيك بدل ما نمشي جنب الحمار.. نشيله، ونمشي بيه
- الحارس : (بطفولية) آه والنبي يا للا شيلوني.. يا للا شيلوني
- القاضي : (بحزم للحارس) جرى إيه يا حارس؟ إحنا ح نقلبها هزار؟
- الحارس : هيه جت عليا؟
- القاضي : خلاص يا جحا.. حلوة يا جحا (بحزم) أدخل القفص تاني يا جحا
- الحارس : (ممسكاً بجحا، ويدفعه داخل القفص متوعداً إياه) بقى أنا تعملني حمار يا جحا!

- جارة 1 : (بميوعة) حلوة خالص يا جحا
- الزوج : الله ينور عليك يا جحا
- القاضي : خلاص نشوف شغلنا بقی
- الزوجة : أنا عاوزه أتطلق من الراجل ده، يا جناب القاضي
(مشيرة للزوج)
- جارة 1 : وأنا بقی عاوزه نص البيض اللي عند الست دي
(مشيرة لجارة 2)
- جار 1 : وأنا عاوز السروال بتاعي اللي لابسه الراجل ده
(مشيراً لجار 2)
- القاضي : (يطرق بمطرقته على المنضدة) نبدأ الأول بجحا
- الحارس : (ينادى) المتهم جحا
- : (يفتح لجحا القفص، فيخرج)
- جحا : أيوه أنا جحا بشحمه ولحمه.. جحا مش خياله
- القاضي : وإيه اللبس اللي إنت لابسه ده؟
- جحا : ده لبسي من يوم ما اتولدت
- القاضي : مفيش لبس أحسن من كده؟
- جحا : ما انت عارف يا جناب القاضي، إني على باب الله..
حتى اللضا مش لاقيه

- الجميع : لا حول ولا قوة إلا بالله
- جارة 1 : (بميوعة) مسكين يا جحا... كبدي عليك يا خويا
- الحارس : أهى بلاوي، وبتترمى علينا
- القاضي : التهمة لبساك لبساك يا جحا
- جحا : أقلعها، أقلعها يا جناب القاضي، أنا مقلتلهاش تلبسني
- القاضي : سنك بالكامل، قصدي اسمك بالكامل؟
- جحا : جحا.. جحا.. جحا
- القاضي : نعم يا خويا
- الحارس : يكونش ده جحا بتاع الكشري
- جحا : (بغضب) لأ.. أنا جحا بن جحا بن جحا، ويرجع نسبي
لجدي الكبير جحا الفيلسوف والحكيم
- القاضي : لا حكيم ولا تمرجي، مش هيه دي القضية
- جحا : أعرف إيه هيه القضية؟
- القاضي : سنك الأول؟
- جحا : معرفش
- القاضي : ساكن فين؟
- جحا : في بلاد الله، لخلق الله

- القاضي : اسمع يا بنى آدم إنت.. إنت ما تتعبنيش معاك
- جحا : أنا طامع في عدالتك يا جناب القاضي
- القاضي : من غير ما تطمع، أنا هنا عشان أحكم بالعدل
- جحا : أنا معملتش حاجة، الناس ما بتصدق تشوفني، تقعد معايا، يشكولي همومهم وأشكيلهم همومي، الناس بتضحك من كتر همومها، لكن أنا مين يضحكني؟
- القاضي : إحنا مقدرين دورك في التخفيف عن معاناة الناس
- جحا : كل ذنبى إن الناس بتحبني، وأنا بحبهم
- القاضي : ما هي دي الجريمة
- الحارس : أنا قلت له كده برضه
- القاضي : (للحارس) اخرس إنت (لنفسه) مش عاوزين نعاقبه بالتهمة دي، عشان الناس ما تتعاطفش معاه (لجحا) اسمع يا جحا، احنا معندناش مانع إنك تحب الناس والناس يحبوك
- جحا : (بفرح) يعنى دي مش جريمة؟
- القاضي : مش جريمة
- جحا : أمال قلت ليه من شوية، إن دي جريمة؟
- القاضي : قلنا ورجعنا في كلامنا، عندك مانع؟
- جحا : لأ معنديش مانع.. حيث كده بقى سيبنى أخرج

- القاضي : مش قبل ما تتحاكم
- جحا : أتحاكم على إيه؟
- القاضي : على عدم تسديك للضريبة
- جحا : ضريبة؟!
- القاضي : ضريبة حب الناس ليك
- جحا : هو حب الناس عليه ضريبة !!
- القاضي : أه، مطلوب منك تسدد خمستلاف دينار لبيت المال
- جحا : مامعيش
- القاضي : يا راجل.. هوه إنت مش أخذت أربعتلاف دينار من السلطان، غير اللي أخذته قبل كده؟
- جحا : (مترددأ) لا.. مش فاكر.. ما أنا كل يوم وليا طرفة
- القاضي : ولو مش فاكر نفكرك (للحضور) فگروه يا جماعة من طقطق لسلام عليكم
- الحارس : أنا ح ألعب دور السلطان
- الزوجة : حابس حابس.. كاشش كاشش، بقى لسه طالع من دور الحمار، وعاوز تلعب دور السلطان (بحزم) ما ينفعش
- الزوج : أنا ح ألعب دور السلطان
- الزوجة : ولا إنت كمان

القاضي : بس إنتى وهوه (مشيراً لجارة 1) إنتى تلعبى دور السلطانة

الزوجة : بس دي بلدي قوى

جارة 1 : أمرك يا جناب القاضي (لنفسها) آه يا ني منى آه،
يا اختي على حلاوتي، يا اختي على جمالي، والنبي أنا
حتة عسلية

القاضي : (لجار 1) وإنت تلعب دور السلطان

جارة 1 : وماله يا جناب القاضي، يا بخت من وفق راسين في
الحلال

القاضي : (لجار 2) وإنت تلعب دور جحا

جار 2 : بعد إذك يا جحا.. أنا ح العب دورك

جحا : إتفضل يا سيدى، بس بالراحة عليا

القاضي : (لجارة 2) وإنتى العبي دور مرجانة

جارة 2 : وماله يا جناب القاضي، ولو إنى كنت علوزه دورين
دور أقعد فيه ودور للعيال

الزوجة : (للزوج) عاجبك كده، أدينا طلعلنا من المولد بلا
حمص

: (يتجهون للتمثيل بخيال الظل من خلال السلويت
أوبمسرح العرائس)

السلطانة : (جارة 1 فى دور السلطانة - تغنى)

: ادلع يا عريس يا بو لاسة نايلون... ادلع يا عريس
وعروستك نايلون

: عند بيت أم فاروق، هاى هاى...والشجرة طرحت
برقوق، هاي هاى (تزغرد)

السلطانة : (لجار 1 — السلطان) إيه مالك يا راجل؟ شايل ليه
طاجن ستك؟

السلطان : إتحشمي يا وليه، قصدي يا سلطانة، وإنت بتكلمي
السلطان، وبعدين إيه الأغاني البلدي دي؟

السلطانة : إتحشمت يا خويا أهوه، لكن ما تمنعنيش من الأغاني
دي

السلطان : براحتك يا سلطانة

السلطانة : مالك يا سلطان، مالك يا راجل، قاعد ومكشّر كمان !
يا عيب الشوم أنا عارفة إيه، اللي يشيل عنك الهم

السلطانة : (تنادى) يا عم جحا.. يا عم جحا

جار 2 : (فى دور جحا) أيوه جاي، إزيك يا مولاي السلطان
إزيك يا مولاتي السلطانة

السلطانة : مولاي السلطان.. شايل الهم شوية، يا للا بقى احكي
له نادرة من نوادرك اللطيفة

جار 2 : (في دور جحا) أحكي له إزاي؟ وأنا شايل الهم أكثر
منه

السلطانة : قال إيه، جبتك يا عبد المعين تعيني، لقيتك يا عبد
المعين عاوز تتعان.. مالك كفى الله الشر يا جحا؟

- جار 2 : (في دور جحا) مراتي ماتت
- السلطان : لا حول ولا قوة إلا بالله
- السلطانة : تلاقيك بتعاني م الوحدة يا جحا
- جار 2 : (في دور جحا) بعاني يا مولاتي
- السلطانة : ولا تشيل الهم، أنا ح اجوزك مرجانة أحلى وصيفاتي،
حلوة ومطبعة، وغلبانة
- جار 2 : (في دور جحا) - أتجوزها يا مولاتي
- السلطانة : مبروك يا جحا
- السلطان : ولك منى ألف دينار، وكل تكاليف الجواز عليا
- السلطانة : (تستكمل الغناء) أهو جالك يا بت... ريح بالك يا بت
أهو جالك من بعيد...جايب لك فستان جديد
- : (ينحسر الضوء عن التمثيل بخيال الظل من خلال
السلويت، أو بمسرح العرايس)
- جحا : افكرت يا جناب القاضي
- القاضي : وديت الفلوس فين يا جحا؟
- جحا : صرفتهم
- القاضي : قصدك بعزقتهم يمين وشمال، ولما الفلوس خلصت
منك، رجعت تانى للسلطان وتقول:
- : (عودة للتمثيل بخيال الظل من خلال السلويت، أو
بمسرح العرايس)

- جار 2 : (في دور جحا — باكياً) إهئ.. إهئ.. إهئ.. مراتي ماتت يا مولاي السلطان
- السلطان : مرجانة ماتت.. يا ألف خسارة.. هو إنت مابيعشلكش نسوان يا جحا؟
- جار 2 : (في دور جحا) حظى ونصيب يا مولاي.. أعمل ايه؟
- السلطان : مرجانة كانت فُلتنا
- جار 2 : (في دور جحا) وريحانتنا
- السلطان : بتقول إيه؟
- جار 2 : (في دور جحا) فوضت أمرى لله
- السلطان : ونعم بالله.. اسمع يا جحا، خد الألف دينار دي مصاريف الجنازة والدفنة.
- جار 2 : (في دور جحا) ربنا يخليك لينا يا مولاي، وما ننحرمش من عطايك (ينحسر الضوء عن التمثيل بخيال الظل من خلال السلويت، أو بمسرح العرايس)
- القاضي : (لجحا) وبرضه أخذت الفلوس وبعزقتهم يمين وشمال، ولما الفلوس خلصت منك، اتفقت مع مرجانة إنها تروح للسلطانة وتقول.....
- : (عودة أخرى للتمثيل بخيال الظل من خلال السلويت أو بمسرح العرايس)

- مرجانة : (جارة 2 في دور مرجانة) إهئ، إهئ، إهئ، جوزي
مات يا مولاتي السلطانة.. جحا مات يا مولاتي، جحا
اللي كان بيضحك طوب الأرض.. مات يا مولاتي
- السلطانة : البقاء لله يا مرجانة، يا ألف خسارة جحا مات؟!
وطوب الأرض معادش ح يضحك
- مرجانة : لا طوب ولا زلط ولا حتى الرملة كمان
- السلطانة : يعنى الخرسانة كلها معادتش ح تضحك
- مرجانة : حسرة عليك يا جحا، يا للي مت في عز شبابك ياخويا
- السلطانة : (باكية) خدى يا مرجانة.. ألف دينار، مصاريف
الجنائز والدفنة
- (ينحسر الضوء عن التمثيل بخيال الظل من خلال
السلويت، أو بمسرح العرايس)
- القاضي : وزى كل مرة الألف دينار تاخدكم وتبعزقهم..
- جحا : (مقاطعاً) left and right
- القاضي : لفت وإيه؟
- جحا : لفت وجرجير، متأخذنيش على كلامي، يا جناب
القاضي
- القاضي : شوف بقى اللي حصل بعد كده
- (عودة أخرى للتمثيل عودة بخيال الظل من خلال
السلويت، أو بمسرح العرايس — السلطان والسلطانة
يتشاجران)

- السلطان : قلت لك مرجانة ماتت
- السلطانة : لأ.. جحا هو اللي مات
- السلطان : مرجانة
- السلطانة : جحا (السلطان والسلطانة يكرران: جحا... مرجانة)
- السلطان : إحنا ح نتخانق ليه؟ أنا حاسس إن فيه لعبة
- السلطانة : وأنا كمان حاسة إن فيه لعبة
- السلطان : قصدك ملعوب من الأعيب جحا؟
- السلطانة : قصدك حيلة جديدة من حيله (يضحكان معاً)
- السلطان : بقولك إيه؟ تيجي نطب عليهم، ونكشفهم
- السلطانة : ونديله ألف دينار مكافأة على حيلته الجديدة (يضحكان)
- (ينحسر الضوء عن التمثيل بخيال الظل من خلال السلويت، أو بمسرح العرائس)
- جحا : (مقاطعاً للقاضي) شفتني وأنا ميت؟
- القاضي : شفتك وأنت نصاب
- جحا : نصاب؟!
- القاضي : ده نصب وتحايل وسرقة
- الزوج : أيوه بس السلطان اعتبرها طرفه، وفضل يضحك
- الزوجة : طول عمر السلطان بيحب شعبه، وما بيحرمهوش من أى حاجة حتى الضحك

- القاضي : نرجع بقى لتهمتك الحقيقية
- جحا : حب الناس ليا؟
- القاضي : لا.. تهمتك.. عدم تسديك خمستلاف دينار لبيت المال.. ضريبة حب الناس ليك
- جحا : مامعيش
- القاضي : اسمع يا جحا، قدامك خيار من اتنين
- جحا : أنا ما بحبش الخيار
- القاضي : مش وقته يا جحا.. إما إنك ترد لبيت المال خمستلاف دينار يا إما....
- جحا : (مقاطعاً) مامعيش ولا درهم.. خلصت كل المال اللي معايا.. بح خلاص
- القاضي : يبقى خلاص قررت المحكمة...
- جحا : استتني يا جناب القاضي.. أنا كنت باملئ جيوب الناس الفاضية بالضحك، وهمه كانوا بيملوا جيوبي الفاضية بالحب، مش هيه دي جريمتي يا جناب القاضي؟ خافين من حب الناس ليا، خافين من فقير جيبه أنصف من الصيني بعد غسيله؟ فقير من يوم ما اتولد، وهو يا مولاي كما خلقتني، أمرى الله، ح يسخطوك يا قرد، ح يعملوك غزال؟! أنا خلاص ماعنتش باشوف
- القاضي : يبقى خلاص ننفيك لجزيرة العميان

- جحا : ماعنتش باشوف إلا الحق، لكن ماعنتش باسمع
- القاضي : نبقي ننفيك لجزيرة الصم
- جحا : ماعنتش بسمع إلا صوت الصدق، لكن عقلي تاه منى
- القاضي : نبقي ننفيك مع التايهين
- جحا : عقلي تاه منى، لما بفكر في أمور الناس، لما يبيعدوا
عن الصح، أنا خلاص بموت
- القاضي : يبقى ح نرمى جتتك للسباع والكلاب
- جحا : (وكأنه في إغماء شديدة) بلغ السلطان إني كنت ناوى
أعلم الحمار بتاعه القراءة والكتابة، وأخذ منه
خمستلاف دينار
- القاضي : معقولة
- جحا : طبعاً ويستلمه منى بعد عشرين سنة
- القاضي : (لجحا بتودد) ممكن تعمل لي تخفيض؟
- جحا : أنا بحس إني بغيب عن الوعي، حاسس إني رايح
لعالم ثاني
- (يتهاوى شيئاً فشيئاً، حتى يسقط فاقدًا للوعي)
- الجميع : (يلتفون حول جحا)
- الحارس : مات
- الجميع : لأ...جحا عايش.. جحا عايش
- القاضي : ح نشوف
- الحارس : محكمة (يعود الحضور أدراجهم، لأماكنهم)



(الفصل الثاني)

(نقلة زمانية لعالم آخر تسوده الحداثة منظم ومرتب، وهو لا ينبئ بمكان معين أو زمن معين... جحا يدخل مذهولاً حيث تتملكه مشاعر الرهبة والقلق، ويلتفت في جميع الاتجاهات ويتبعه فرحان دون أن يستشعر به، ويلزمه من الخلف ويتتبع خطواته مقلداً له)

جحا : إيه المكان الغريب ده؟ أنا فين؟ مشفتش مكان زي كده
أبدأ، يظهر إني في عالم تانى معروفش (لنفسه) لما
أقعد أستريح شوية (يترك بجانبه العصا)

فرحان : (يقف خلف جحا ويحرك عصامته)

جحا : العمة بتتحرك فوق دماغي ! (لنفسه) بالذمة ده كلام
يا جحا؟! العمة بتتحرك فوق دماغك ولا دماغك
بتتحرك جوه العمة؟! يظهر التعب خلاك تحس
بتهيؤات

فرحان : (يحرك العصا)

جحا : الله.. الله.. إيه ده ! فيه إيه؟! العصا كمان بتتحرك !
(لنفسه) ما قلت لك يا جحا.. التعب خلاك تحس بتهيؤات

فرحان : (ينام خلف جحا)

جحا : لما أنا شوية (يغير من وضعه، فتسقط يده محتضنة
فرحان، فيقفز من مكانه) إيه ده عفريت؟ (يرتد للخلف)
سلام قولاً من رب رحيم.. أول مرة أشوف عفريت
بالشكل ده! (يصطدم أثناء ارتداده للخلف بسعيد، فيصرخ
ويجرب محاولاً الهرب منهما، لكن في كل مرة يسدان
الطريق عليه، فيقع منهكاً) أنتم مين؟

فرحان : طبعاً إحنا مش عفاريت
 سعيد : إحنا حراس الجزيرة
 جحا : جزيرة؟!
 فرحان : جزيرة الأمانى
 جحا : (ساخراً) أمانى ولا تهانى؟!
 سعيد : (يلكز جحا) أنت بتتريق يا حضرة؟!
 جحا : لا سمح الله، أنا لا بتتريق ولا حاجة، أنا بضحك بس
 فرحان : أنا فرحان
 سعيد : وأنا سعيد
 جحا : وأنا أكثر منكم
 فرحان : دى أسامينا يا حضرة
 جحا : أنعم وأكرم
 سعيد : وأنت مين؟
 جحا : محسوبكم جحا
 فرحان : جحا مرة واحدة
 جحا : أيوه مرة واحدة، ولو مش عاجبكم نخليها على مرتين
 فرحان : (هامساً لسعيد) ده لإما يكون حرامى...
 سعيد : (مستكماً همساً) لإما يكون جاسوس، جاي يتجسس علينا، ويعرف أخبارنا
 (فرحان يخرج صفارته من جيبه، ويطلق بها صفيراً
 فيتجمع ذوو الإعاقة حوله على الفور في وضع تحفز)
 جحا : (يصرخ فيهم) أنا جحا.. جحا.. جحا

- فرحان : (لجا) جحا اللي بيضحك الناس؟! :
 سعيد : (مستكماً) ولا جحا اللي جاي يضحك علينا?
 جحا : أنا جحا اللي بيضحك الناس، ويز غز غهم كمان
 ياسمينا : فيه حد في الدنيا ما يعرفش جحا?
 خميس : (لياسمينا) جحا بتاع الطرف والحكايات?
 جحا : أيوه أنا جحا بتاع الطرف والحكايات
 جمعة : بس جحا مات من زمان
 جحا : صدقوني أنا جحا.. جحا
 ياسمينا : وأنا مصدقك.. مصدقك
 جحا : (مشدوداً نحو ياسمينا) مصدقاني؟!
 ياسمينا : أيوه مصدقك
 خميس : (لجا بتودد) أخوك خميس
 جمعة : (لجا بتودد أيضاً) أخوك جمعة
 جحا : وأنا أخوكم ثلاث... قصدي جحا
 ياسمينا : (تضحك) هو ده جحا بظرفه ولطفه
 جحا : وإنتي مين?
 ياسمينا : ياسمينا
 جحا : ياسمينا ولا يا تخينا؟ (يضحك، فيضحكون معه)
 اسمك حلو قوى يا ياسمينا
 ياسمينا : شكراً
 (يتقدم نوفل وعوكل من جحا ويمسكان به، ويتحدثان حديثاً غير مفهوم)

- نوفل : (بإشارات وإيماءات)
- عوكل : (ببإشارة نوفل والإيماءات)
- جحا : يا عالم يا ناس، حد يفهمني، أما مش فاهم حاجة !
- فرحان : (مشيراً لنوفل) ده أخونا نوفل (ومشيراً للآخر) وده
أخونا عوكل
- جحا : نوكل وعوكل
- سعيد : لأ.. نوفل وعوكل
- جحا : خلاص عرفت (مشيراً لنوفل) ده نيفل (ومشيراً
لعوكل) وده نيكل
- ياسمينا : يخبيك يا جحا، نيكل إيه وقصدير إيه؟
- فرحان وسعيد : (الاثنتان معاً) نوفل وعوكل
- جحا : مش هيه دي القضية، القضية أموت وأعرف همّه
بيقولوا إيه؟
- فرحان : بيقولوا لك، إنت جاي منين؟
- سعيد : وعاوز إيه؟
- جحا : يا سلام، كل ده عشان يقولولي، إنت جاي منين؟
وعاوز إيه؟
- جاسر : (يتحرك نحو جحا) مش مهم إنت مين؟ ولا جاي منين؟
المهم إنت عاوز إيه؟
- جحا : أنا جحا، وجاي من زمن غير زمنكم، وعاوز أعيش
وسطيكم
- ياسمينا : واحنا عاوزينك تعيش وسطينا

- جحا : شكراً مره تانية يا ياسميننا
- جاسر : اللعب غيرها يا جحا
- ياسميننا : لا يا جاسر، أنا قلبي بيقول لي هو جحا، طيب هو لابس إيه؟
- فرحان : لابس لابس جحا
- سعيد : نفس اللبس اللي بنشوفه في الكتب
- ياسميننا : يبقى هو جحا اللي بنقرا عنه
- خميس : حاسينه بصوته
- جمعة : شايفينه بقلوبنا
- (نوفل وعوكل يعترضان بإشارات وصياح غير مفهوم، بينما ياسميننا تتقدم إليهما ويحتدم بينهما النقاش)
- ياسميننا : لأ هو جحا، أنا قلت هو جحا، أنا عارفاه من زمان
- جحا : (بتحسر) أعمى بيتخانق مع أطرش، لا الأعمى شايف، ولا الأطرش سامع
- كريم : (منادياً لجحا) يا جحا، يا جحا
- باسم : (منادياً لجحا) تعالى يا جحا
- جحا : (يتقدم نحوهما) إزيكم يا حبايبي
- كريم وباسم : (معاً) إحنا كويسين
- كريم : أنا كريم
- باسم : وأنا باسم
- كريم : احكي لنا يا جحا حكاية الحلة اللي بتتكلم
- باسم : واحكي لنا كمان حكاية السندوتش اللي مليون بريحة الكباب

- جحا : مين حكي لكم الحكايات دي؟
- كريم وباسم : أختنا ياسميننا
- جحا : (بتعجب واندهاش) ياسميننا ! فعلاً ياسميننا
- ياسميننا : متشكرة أوى يا جحا، ممكن بقى تحكي لهم كل حكاياتك ونوادرك
- جحا : حاضر
- كريم وباسم : إحنا بنحبك يا جحا
- جحا : وأنا كمان بحبكم خالص
- جاسر : (لجحا) حد قالك إن إحنا عندنا حفلة تنكرية؟
- جحا : مش فاهم
- جاسر : كلك على بعضك كده مش مريحني
- جحا : ولا مريحني كمان، نفسي أبقى زيكم، واحد منكم
- جاسر : (يتحدث بلغة الإشارات نحو نوفل وعوكل، ويتابعانه فرحان وسعيد)
- نوفل وعوكل : (يفهمان حديث جاسر، ويتخذان وضع التحفز نحو جحا)
- ياسميننا : قلت لهم إيه يا جاسر؟
- جاسر : قلت لهم ده واحد جاي يستولى على بيوتنا
- فرحان : أو.. واحد جاي يعمل دراسة علينا
- سعيد : أو.. واحد جاي يجرب دوا فينا

ياسمينا : اللي بتقولوه ده غلط، ليه ما يكونش ده جحا اللي جاي
يحل مشاكلنا، أو جحا اللي هربان من العالم بتاعه
وجاي يحتمى بينا

خميس وجمعة : يحتمى بينا إحنا !!

ياسمينا : أيوه إحنا، ثم إننا متعودناش نطرد حد

جاسر : (بغضب شديد) ما تسمعوش كلامها

جحا : (بإعجاب شديد) ياسمينا... إنتي إنسانة عظيمة

ياسمين : أنا بعمل الواجب

جاسر : (يعطى علامة خطر متفق عليها)

فرحان وسعيد : (يكرران نفس العلامة)

عوكل ونوفل : (يستجيبان لنفس العلامة، بينما فرحان وسعيد

وعوكل ونوفل يلتفون حول جحا)

جاسر : (لجحا) دخلت عش الدبابير

جحا : لا دبابير ولا نحل، أنا افكرت إنكم ح ترحبوا بيا، ح

أكون عاوز إيه يعنى؟! غير إنى أعيش وسط ناس

أحبهم ويحبوني.. أنا حقيقي أسف ..يمكن أكون

اقتحمت عالمكم بشكل غلط.. لكن صدقوني كان نفسي

أكون العين اللي بتشوفوا بيها وودانكم اللي بتسمعوا

بيها، وأكون إيديكم ورجليكم، وكل حاجة افتقدتوها

فرحان وسعيد : إحنا مش ناقصنا حاجة

عوكل ونوفل : (يحاكيان نفس رد فعل فرحان وسعيد)

جحا : خلاص.. أنا ماشي.. عن إذنكم (يهم بالانصراف)

- ياسميننا : ما تمشيش يا جحا
- خميس وجمعة : إحنا عاوزينك إنت ؛ وناقصنا إنت
- كريم وباسم : إحنا عاوزينك إنت ؛ وناقصنا إنت
- ياسميننا : ما تخليهوش يمشي يا جاسر من فضلك
- جاسر : حاضر يا ياسميننا، طلباتك أوامر، اتفضل يا جحا
- جحا : يعنى ممكن أعيش معاكم؟
- جاسر : آه
- جحا : بقول لياسميننا
- ياسميننا : طبعاً آه.... ممكن تعيش معنا
- جحا : طلباتك أوامر يا....
- ياسميننا : يا سميننا (تضحك برقة)
- جاسر : (متراجعاً) بس بشرط !!
- جحا : شرط إيه؟
- جاسر : تبقى واحد زينا
- فرحان : نشيل عينيك
- سعيد : نخرم ودانك، ونقطع لسانك
- جاسر : أو نقطع رجلك أو إيدك
- سعيد : وطّي كده (جحا يخفض من قامته)
- فرحان : (يطرق فوق رأس جحا) أو نخبطك فوق دماغك
- ياسميننا : (تصرخ) لأ... لأ... أنا عاوزاه كده

- جحا : (متألماً) هو أنا عشان أعيش وسطكم، لازم أكون
محتاج لنظر، أو لسمع، أو لسان أتكلم بيه؟ أو أكون
محتاج لحركة، أو لعقل كامل؟ طب مانا محتاج
- ياسمينا : محتاج لإيه يا جحا؟
- جحا : محتاج لحد يرعاني.. حد ياخذ باله مني... حد يحبني
- ياسمينا : قطعت في قلبي يا جحا
- جحا : أبقي زيكم ولا لأ
- جاسر : لأ.. مش زينا
- جحا : إزاي؟
- ياسمينا : (بتحسر) إزاي دي بقى هيه اللي جابتنا هنا !!
- جحا : مش فاهم حاجة
- خميس : أفهمك أنا... كل واحد فينا يا جحا، جه هنا هربان من
مشكلة مقدرش يحلها
- جمعة : أنا مثلاً حبيت واحدة كفيفة زيي، لكن أهلها للأسف
رفضوا جوازنا عشان شايفين بكل بساطة إن كل واحد
فينا، محتاج لحد مبصر يساعد في حياته
- خميس : أما أنا فعلاً.. اتقدّمت لواحدة مبصرة، واتجوزتها
بالفعل، بعد كده اكتشفت إن أهلها كانوا غاصبين عليها
لأنهم فقرا، وأنا حالتي كانت متيسرة
- جحا : وبعدين؟

خميس : ولا قبلين.. كنت أسمع زمايلها يقولوا لها: ليه نظرة
الحزن دائماً جوه عنيكى؟ حسيت إن حياتها إتصابت
بالشلل التام، ما استحملتش طلبت الطلاق، طلقته
وجيت أعيش هنا

ياسمينا : لو كانت بتحبك كانت عاشت معاك زي ما عاشت
سوزان مع طه حسين ستة وخمسين سنة

جحا : سوزان وطه حسين ! أنا أول مرة أسمع عن الأسامي
دي

ياسمينا : بعدين أحكي لك عنهم يا جحا

جمعة : تخيل نفسك يا جحا... ان ابنك يتولد من غير ما
تشوفه، ويكبر من غير ما تشوفه ويتجوز من غير ما
تشوف عروسته، ولا تشوف حفيدك

خميس : تخيل نفسك يا جحا ما تشوفش إلا الضلعة، ما تشوفش
الشارع ما تشوفش الزحمة، ما تشوفش الدنيا بكل اللي
فيها

جمعة : ليه قلبت علينا الأحران يا جحا.. يا لا بينا يا خميس يا
خويا نلعب عشرين دومة

خميس : لا مش قبل ما تيجي معايا تصلح لي الكمبيوتر
والموبايل بتوعي

جحا : إيه حكاية الدومة والكرومة والمونبايل دي؟

ياسمينا : بعدين أحكي لك عنهم يا جحا

جاسر : (مغنياً): ليه يا حمام بتنوح ليه، فكرتني بالحبايب، يا هلترا نرجع لأوطان، ولا نعيشوا بلا حبايب (مشيراً لساقه... ثم يخفت الغناء) جربت مرة، وإنت بتتفرج على سبق، وتفتكر إنك كنت في يوم من الأيام بطل فروسية.. ولا أجدعها بطل، قبل ما تقع من على حصانك ورجليك تتكسر وتتبتتر

جحا : إحساس مؤلم طبعاً

فرحان : جربت مرة تحس إنك مهما كبرت، إن الناس بيعاملوك على إنك طفل صغير وإن قدراتك العقلية محدودة

جحا : إزاي؟

سعيد : إزاي دى بقى.. عليك وعلى السیما والتلفزيون، يقولوا لك إزاي خلونا مادة ترفیه وضحك للناس

جحا : سیما وفلفزيون ! إنتم بتقولوا كلام غريب عنى!

ياسمینا : بعدین أحكي لك عنهم يا جحا

ياسمینا : (تتأدى) كريم... باسم

كريم : (يتجه لياسمینا) عاوز جحا يحكي لنا حكاية الحلة اللي بتتكلم

جحا : (موضحاً لكلامه) حكاية الحلة اللي بتتكلم، حاضر

باسم : (متجهاً لياسمینا أيضاً) أبوه ويحكي لنا حكاية السندوتش اللي مليان بريجة الكباب

جحا : (موضحاً لكلامه أيضاً) حكاية السندوتش اللي مليان بريجة الكباب

: حاضر

ياسمينا : (ممسكة بيد كريم) ده كريم.. أهله حبسوه جوه البيت

مرضوش يخلوا حد يشوفه، كانوا بيتكسفوا منه، كريم

ما صدق يهرب م البيت لحد ما قابلناه وجبناه هنا

كريم : (متلعثمًا) همه مش عاوزيني أخرج... أنا كنت مخنوق

ياسمينا : (ممسكة بيدها الأخرى باسم) وده باسم، وزى كل اللي

شافوه هنا مبتسم على طول، أهله سابوه يلف الشوارع

والميادين، الناس كانوا بيعطفوا عليه، ويدوا له فلوس،

هو كان بياخد الفلوس من هنا، وأهله ياخدوها من هنا،

واعتبروه مصدر دخلهم، غفلناهم وأخذناه منهم وجبناه

هنا

باسم : (مقلداً هيئته كمتسول) الله يا محسنين لله...

فرحان : (يتجه نحو نوفل) أما نوفل كان.....

نوفل : (يقوم ببعض التعبيرات الصوتية ؛ ويترجمها جاسر

بلغة الإشارات)

جحا : بيقول إيه نوفل؟

فرحان : (في نفس التوقيت يحول إشارات جاسر بلغة منطوقة)

بيقول إنه اتعلم واتعرف على كيفية، حبها وحبته

اتقابلوا، علمها لغة الإشارات، مسك صابعتها، وشرح

لها إنه عاوز يخطبها، فرحت، ولما صارحوا أهلهم

رفضوا، وجه هنا

عوكل : (يقوم أيضاً ببعض التعبيرات الصوتية، ويترجمها

جاسر بلغة الإشارات)

سعيد : (في نفس التوقيت يحول إشارات جاسر بلغة منطوقة)
أما عوكل شاف مرة مذبة، قام وجرى وأخذ منها
المايك، ولما حب يعبر عن نفسه، ملقاش اللي يفهمه
وما كان من المذبة.. إلا إنها فطست على نفسها م
الضحك، ومن يومها قرر عوكل إنه بيحي يعيش
معانا هنا

جحا : تقريباً فهمت بس مش عارف إيه حكاية..
ياسمينا : (مستكلمة) المايك والمذبة.. بعدين أحكي لك يا جحا
جحا : وائت إيه حكايتك يا ياسمينا؟
جاسر : (مغنياً) نوح الحمام والإمري على الغصون.. أه يا
ليلي يا عين..

ياسمينا : (بالتزامن مع غناء جاسر) أنا كفيفة مرضيتش أتجوز
إلا واحد أكون بحبه

جاسر : (مغنياً) والحو جاى يتمختر، طالب وصال... أه يا
ليلي يا عين

ياسمينا : كفيف، مبصر، مش مهم، ولما ملقيتش حد أحبه، قلت
آجي أعيش هنا

جاسر : (مغنياً) ساكن جلوب العاشقين... أه يا لا لى

ياسمينا : لكن أنا حاسه إن عدلي خلاص جه

خميس : (يغنى) عريسي جه

جمعة : (يغنى) أنا جايه أهوه

جحا : إنتم كلكم دمكم خفيف... بس كل ده خلاكم تيجوا هنا؟

- جاسر : أيوه، كل ما نحاول نخرج من عالمنا الضيق للعالم الكبير، نحس بعجزنا، ونحس كمان إننا ناس مش عاديين
- جحا : فعلاً إنتم ناس مش عاديين
- الجميع : (بدهشة واستنكار ومعهم عوكل ونوفل بإشاراتهم) إزاي؟
- جحا : مش عاديين لأن جواكم إرادة، وتحدي، وإصرار، ما لهمش مثيل
- ياسمينا : وعرفت إزاي؟
- جحا : من عشرتي للناس اللي زيكم في عصرنا
- الجميع : (يرددون ومعهم نوفل وعوكل بإشاراتهم) إحنا قادرين على التحدي ومواجهة الواقع في كل مكان وكل زمان
- خميس : والناس اللي بيشفوننا أشخاص غير مكتملين؟
- جحا : (يربت على كتف خميس) دول ناس مش فاهمين، بس اوعوا الإحساس ده يتسرب جواكم
- جاسر : اسمعوا يا جماعة (الجميع يذهب إليه ويتهامسون)
- فرحان : (بإشاراتهم لعوكل ونوفل وإيماءات موافقة منهما)
- وسعيد
- جاسر : (لجحا) إحنا خلاص يا جحا... قبلنا تعيش وسطينا وبدون شروط
- جحا : وأنا ممنون.. ممنون ليكم كلكم
- جاسر : بس لازم نشوف لك شغلانة

- سعيد : عشان كلنا هنا بنشتغل
- جحا : أنا شغلتي النوادر، والطرف، والحكايات
- ياسمينا : عاوزينك تشتغل شغلانة تاكل منها عيش، ونفتح بيها بيت (مستدركة) قصدي تفتح بيها بيت يعني
- جاسر : احنا كنا محتاجين لحد يعبر عننا
- فرحان : حد يحبنا
- ياسمينا : حد نحبه
- خميس : (مغنياً) والشحط ده موجود هنا؟
- جمعة : (مغنياً) يعني إنتي عارفه مش كده
- جحا : (لياسمينا) ياسمينا، أنا هربت م العالم بتاعي، عشان كانوا فارضين عليا أدفع ضريبة نظير حب الناس ليا
- جاسر : وإحنا كمان فارضين عليك ضريبة
- جحا : إنتم كمان؟! وضريبة إيه دي؟
- جاسر : ضريبتنا المفروضة عليك، إنك تكون مسئول عننا ولسان حالنا كلنا
- ياسمينا : وتعبّر عن مشاعرنا وأحلامنا
- جاسر : وتمثلنا قدام المحافل والمؤتمرات، وتتكلم نيابة عننا
- جحا : (مترددًا) أيوه بس؟!
- ياسمينا : ما تخافش يا جحا، إحنا هنا حياتنا مترتبة ومنتظمة وكل واحد فينا بيعوّض الثاني

- جاسر : (بقرار حاسم) إنت من النهارده يا جحا، فُكّهاتي الجزيرة
- جحا : يعنى إيه فُكّهاتي؟ هو مفيش فكهاني هنا؟
- جاسر : فُكّهاتي يا جحا.. فُكّهاتي.. افهم بقى
- ياسمينا : يا للا يا جحا فرفشنا... ضحكنا يا جحا ضحكنا
- الجميع : يا للا يا جحا فرفشنا... ضحكنا يا جحا ضحكنا
- (نوفل وعوكل يرددان نفس الجملة بإشاراتيهم)
- كريم : يا للا يا جحا فرفشنا
- باسم : يا للا يا جحا ضحكنا
- ياسمينا : قلت إيه يا جحا؟
- جحا : (بتلعثم) أنا.. أنا؟!!
- ياسمينا : مش ح نلاقى أحسن منك يا جحا، وافق عشان خاطري، عشان خاطرنا كلنا
- جحا : أنا؟!!
- الجميع : إيه؟
- جحا : موافق
- الجميع : (يهللون) هيه... يعيش جحا واحد مننا
- جحا : (لياسمينا) مبروك يا يا سمينا
- ياسمينا : مبروك يا سى جحا... قصدي يا فُكّهاتي الجزيرة

- جـا : هل تقبليني بعلأ لك؟
- ياسمينا : أقبلك يا فُكها تي الجزيرة.... سمّعوني بقى أحدى زغرودة
- جاسر : (مغنياً) مساء جميل، ألفين مبروك، يا صحبة جامعة كل حبيب.. عريسنا يبقى أخويا وأخوك، ولما جه خبط ع الباب، وفتحنا له.. الله الله، هيّصنا له.. الله الله ورقصنا له.. الله الله، زغردنا له.. الله الله
- (يخفت الصوت ثم يبدأ حفل تنصيب جـا فُكها تي للجزيرة ويحضرون مقعداً فخماً له، وبعض المقاعد الأمامية)
- جـا : باسمى أنا جـا جـا جـا.. اللي حكايتي ليها العجب واللي نوادرى مالىه الكتب
- ياسمينا : وباسمى أنا الحرم المصون.. زوجة جـا اللي سُمعته في البلاد ولا أجدعها سندباد
- جـا : إنني في خدمتكم دائماً، وسأعمل على تحقيق مطالبكم
- الجميع : (يصفقون)
- جـا : (يخرج مطوية ويهم بالكتابة)
- خميس : عاوزين تضمن لنا حياة كريمة
- جمعة : مش عاوزين الناس يزاحموننا في أماكننا في وسائل المواصلات
- جـا : ح أجيب لكل واحد فيكم حمار
- ياسمينا : الحمير معادتش بتتركب، إحنا بقينا نركب مترو
- جـا : مترو ولا نص مترو

- ياسمينا : يعني إيه؟
- جحا : بعدين أحكي لك عنه يا ياسمينا
- ياسمينا : (تضحك) ماشي فخامتك يا فُكهاتي الجزيرة
- سعيد : مش عاوزين ناخذ مرتباتنا صدقة
- فرحان : مش عاوزين تعاطف إنساني، ومصمصة شفايف
- خميس : مش عاوزين شهادتنا في المحاكم تبقى قرينة..
- عاوزينها تبقى دليل
- ياسمينا : مش عاوزين الناس يفتكروا كل كفيف خفيف الظل
- جمعة : صح واللي قدامك أهو.. خميس دمه يلطش
- خميس : أنا دمي يلطش يا جمعة؟
- ياسمينا : ومش عاوزين الناس يفتكروا كل كفيف شيخ
- خميس : صح واللي قدامك أهو جمعة، هو اللبط نفسه
- خميس : (لجمعة) خلصانة
- جمعة : (يصافح خميس) خلصانة
- خميس : مش عارف ألاقها منك، ولا م الحرامية، اللي كل ما
- أجيب عصاية يخطفوها مني
- جحا : العصاية اللي بتسوق بيها الحمار؟
- جمعة : لأ العصاية اللي بيسوق بيها نفسه (يضحك) كده بقي
- خلصانة بشياكة
- ياسمينا : وأنا ليا بقي طلب منك يا فخامة سعادة فُكهاتي الجزيرة
- جحا : إتفضلي اطلبي يا نن عين فخامة سعادة فُكهاتي الجزيرة
- ياسمينا : عاوزاهم يخفوا شوية من الأغاني اللي بتنتقل عن العين

- خميس : (يغنى) عيون القلب سهرانة.....
- جمعة : صح ودارى العيون داريها..
- خميس : (يغنى) دارى العيون داريها ؛ السحر ساكن فيها.....
- ياسمينا : ومين السبب في الحب؟.....
- خميس : (يغنى) القلب ولا العين.....
- خميس وجمعة : (يغنيان معاً) يا عيني.. يا عيني ع الصبر يا عيني عليه...
- ياسمينا : ويبطلوا يقولوا نكت علينا
- خميس : ولو إنا أحسن ناس ننكت على نفسنا
- جحا : (منزحاً) تتكدوا على نفسكم؟!
- الجميع : (يضحكون، ومعهما نوفل وعوكل بإشاراتيهما)
- خميس : قال إيه واحد أعمى فُتَّح ؛ من كتر الفرحة إتشل
- جمعة : بالذمة دي نكتة
- جحا : (هامساً لـ ياسمينا) نكتة يعنى طرفة... صح؟
- ياسمينا : صح
- جحا : تطلبوا إيه تاني؟
- خميس : عاوزين نحس إنا مش عبء على المجتمع
- فرحان : ونحس كمان، إنا طاقة منتجة، ولينا فائدة
- ياسمينا : وأهم حاجة يتم دمجنا جوه الأسرة، والمدرسة، والمجتمع
- جحا : وإيه تاني؟

- ياسمينا : (متصنعة البكاء) مش عاوزين يجي يوم يفكروا
يتخلصوا مننا عشان مواجهة المجاعات، أو يجمعونا
خارج البلاد عشان يخففوا من عدد السكان، عشان
حواسنا المفقودة
- جحا : ما تخافيش يا ياسمينا ؛ ما حدث ح يفكر في كده أبداً
- ياسمينا : (بنفس حالة التباكي) عاوزه كمان أروح السيرك
- جحا : يعنى إيه سيرك؟
- ياسمينا : اسمع يا جحا.. بعد المسرحية ح أذكك على أي كافيته
وهناك أحكي لك على كل حاجة
- جحا : ماشي يا ياسمينا
- ياسمينا : مسألتنيش يعنى إيه كافيته؟
- جحا : ده أكيد اسم بلد قريب من هنا
- ياسمينا : اسم بلد؟ طب يعنى إيه مسرحية؟
- جحا : مسرحية يعنى مسرحية
- ياسمينا : لا والنبي.. يعنى إيه مسرحية؟
- جحا : (بحزم) مش وقته يا ياسمينا
- جحا : (للجميع) اسمعوا يا جماعة.. كل مشاكلكم
محولة، وطلباتكم مجابة
- الجميع : (وعوكل ونوفل بإشاراتيهم) يعيش جحا.. يعيش جحا
- جحا : (مشيراً إليهم بالإنصات) مشاكلكم محولة عندي
بالطريقة الجحوية مش بالطريقة العصرية

- الجميع : (وعوكل ونوفل بإشارتهما) مش فاهمين
- جحا : يعنى تيجوا معايا لعصري.. وهناك أحلكم كل مشاكلكم
- ياسمينا : ما ينفعش تيجي معانا لعالمنا إحنا؟
- جحا : أنا من زمن وأنتم من زمن ثاني
- ياسمينا : والحل؟
- جحا : لازم تنزلوا للناس مرة ثانية
- الجميع : (يتهايمسون) ننزل للناس ثاني؟! (عوكل ونوفل يستفهمان الموقف بإشاراتييهما، ويقوم جاسر بالشرح لهما، فيعترضان بإشاراتييهما أيضاً)
- جحا : الانعزال ضعف، وأنا ما بحبش الضعاف
- ياسمينا : أيوه بس إحنا أخذنا على حياتنا هنا، أرجوك تعالى معانا يا جحا، أنا ما صدقت لقيتك
- جحا : وأنا كمان ما صدقت لقيتك يا ياسمينا.. صدقيني لا ح تقدري تعيشي جوه زمني، ولا أنا ح أقدر أعيش جوه زمنك
- ياسمينا : أيوه بس أنا....
- جحا : (يتنهد) وأنا كمان (يغير من حالته) بس أكيد ح تلاقى جوه الناس ألف جحا.... دوري ما تتعيش
- ياسمينا : أنا عاوزاك أنت
- جحا : ما لناش نصيب لبعض

- ياسمينا : مش ح ألاقيك يا جحا إلا في الكتب
- جحا : الوداع يا ياسمينا
- ياسمينا : الوداع؟ ياااااااااه أول مرة أحس بمرارة الوداع، أول مرة أحس بطعم الوجع، ويااااااه على طعم الوجع ، لما الست فينا تخسر الراجل الجدع، أنا عارفة طول عمري حظي وحش
- جحا : ح تلاقي ملامحي مرسومة على وشوش ناس تانيين
- ياسمينا : وإنت كمان ح تلاقي ملامحي مرسومة على وشوش ناس تانيين... إ حنا ممكن نتقابل تاني؟
- جحا : متصعبيش علينا الفراق
- جحا : (للجميع) يا للا انزلوا لعالمكم تاني، واثبتوا وجودكم مش لازم تفقدوا الثقة في نفسكم
- جاسر : أيوه مش لازم نفقد الثقة في نفسنا
- الجميع : (يتجه للجمهور وعوكل ونوفل بإشاراتيها) إنتم إحنا وإحنا إنتم
- خميس : مننا طلع طه حسين، وسيد مكاي، وعمار الشريعي
- سعيد : ليونهارت أويلر... أعظم عالم رياضيات
- جمعة : مدام كوري... عالمة الفيزياء ومكتشفة الراديو
- فرحان : هيلين كيلر وأبو العلاء المعري.. رهين المحبسين
- خميس : بشار بن برد
- ياسمينا : (ببكائية) إن العيون التي في طرفها حور.... قتلنا ثم لم يحيين قتلنا

جاسر : بينا يا جماعة ننزل للناس

الجميع : (ومعهما نوفل وعوكل بإشاراتيهما) الوداع يا جحا
الوداع يا جحا

ياسميننا : (تبقى بمفردها) الوداع يا جحا (ينتظرها فرحان ليمسك بيدها ،حيث يتهيا الجميع للنزول إلى الصلاة)

جاء : الوداع يا ياسميننا (ينام في نفس الموضوع الذي أغشي عليه فيه)

لما انام شوية ، قدامي سكة سفر طويلة

(سـتار)



(الفصل الثالث)

(نفس منظر الفصل الأول.... الحارس مستلقى على أحد المقاعد الخلفية... بينما جحا
مازال نائماً في نفس المكان)

الزوجة : (تدخل ووراءها الزوج دون أن يشاهدها جحا النائمة)

تعالى ورايا يا سبع البرومبة.. هيه ساعات.. وكل
واحد فينا ح يبقى من طريق (باكية) ساعات إيه بس؟
ده مجرد ما يبجي القاضي، وأقوله ح يطلقني على
طول (تصرخ) يا ميله بختك يا فتكات

الزوج : أنا عاوز أعرف إنتي زعلانة ولا فرحانة؟

الزوجة : فرحانة يا خويا... ده حتى بالأمانة ح اعمل حفلة
طلاق بالليل

الزوج : (ببرود) و ح تعزميني يا فتكات

الزوجة : يا خيبتك يا فتكات، أيوه يا خويا ح أعزمك، ده أنا
حتى عاملة لك سم هاري، تاكله بالهنا والشفاء.. بس ما
تنساش تيجي

الزوج : لأ مش ح أنسى يا فتكات

الزوجة : يا عالم يا ناس الراجل ده ح يجنني.. الله يرحمك يا
امه كانت دايماً تقولي.. الجواز يا فتكات يا بنتي، أكبر
غلطة، لا يصيبك، لا يجيلك جلطة

الزوج : بعد الشر عليك يا فتكات

الزوج : (يلمح جحا نائماً) الله.. بصي شوفي.. ده جحا لسه
نايم مطرحة

الزوج : (لجحا) يا جحا.. يا جحا... اصحى بقى يا جحا

- جحا : (محاولاً الاستيقاظ) أنا مش جحا، أنا بقيت.....
- الزوجة : (مقاطعة) بقيت إيه يا جحا؟
- جحا : (ينام مرة أخرى)
- الزوج : فوق يا جحا... قوم بقى اصحى
- جحا : (يستيقظ متثائباً) إيه ده؟ أنا فين؟
- الزوج : في المحكمة يا جحا
- جحا : محكمة؟! محكمة إيه؟ أمال فين ياسميننا، وفين فرحان وسعيد، وفين خميس وجمعة؟
- الزوجة : جبت الأسامي دي منين يا جحا؟
- جحا : زمانهم هناك وبيطالبوا بحقوقهم، ربنا معاك يا جاسر يا نهار أبيض، نسيت أوصيه على كريم، وباسم وعوكل، ونوغل
- الزوجة : (تشير على جحا بعلامة الجنون) باين عليك وصلت يا جحا
- جحا : وصلت
- الزوجة : حمد لله ع السلامة (تلمح الحارس نائماً على إحدى المقاعد) وإيه ده كمان الحارس نايم؟! (مشيرة لأحد المقاعد)
- الزوج : (للحارس) قوم يا حارس، قوم يا حاجب
- الزوجة : قوم يا حاجب، قوم يا رمش، قوم يا عين
- الحارس : (يستيقظ ويهتد واقفاً) يا نهار أبيض، ده الشمس طلعت

- الحارس : (يجرى مهرولاً)
- الزوجة : رايح فين يا حارس؟
- الحارس : رايح لقصر السلطان، أجيب مكتوب مولاي السلطان
لجناب القاضي (يخرج)
- الزوجة : آه يا فتكات يا أختي، تاخدي اللي يحبك، تاخدي اللي
تحبيه، أهي كلها خوازيق
- الزوج : اهدي بس يا فتكات
- جحا : (ينهض) ياه، كل ده نوم (للزوج والزوجة) تخیلوا
نايم من إمبراح لحد النهارده، كل ما أصحى، أنام
تاني، وأفضل أكمل في الحلم، لحد ما بقيت هنا
(يضحك) فُكها تي الجزيرة!!
- الزوجة : فُكها تي مرة واحدة (تستدرك) يعنى إيه فُكها تي؟!
- جحا : فُكها تي يعنى فُكها تي
- الزوجة : نورت المحكمة يا جحا
- الزوج : طب روح اقعد هناك بقى في القفص ده، لحد ما يبجي
جناب القاضي
- جارة 2 : (داخلة) وهو يعنى عشان الديك بتاعك، بيبجي يزور
الفراخ اللي عندي، تقومي تاخدي نص البيض؟
- الزوج : أهُم الحبايب، هُلُوا، أهُم
- جارة 2 : (لجارة 1) الديك بتاعك بقى يا حبيبتي، عينه زايغة
مش مكفيه فرخة واحدة رايح للفراخ كلها
- الزوج : يا بخته



- الزوجة : اسكت إنت
- جارة 1 : أيوه يا ختى آخذ نص البيض، لأنه ما بقاش بيض عادى
- جارة 2 : مش فاهمة !!
- جارة 1 : بقى بيض متكسر (لنفسها) دي مصيبة إيه دي !
- جارة 2 : ده بيض سليم والله
- جارة 1 : (لنفسها) يادي النيلة (لجارة 2) متكسر يعنى ما يتاكلش (لنفسها) أفهمها إزاي دي بس !!
- جارة 2 : برضه مش فاهمة
- جارة 1 : (لنفسها) يا مصيبتى السوداء (لجارة 2) متكسر يعنى لو أي فرخة قعدت عليه يفس، ويطلع كتاكيت
- الزوج : ما ينفعش يطلع بط، ووز، وأرانب؟
- الزوجة : اسكت إنت
- جحا : هم يضحك، وهم ييكي
- الزوجة : وهم يا جمل
- جارة 1 : الشملول الديك بتاعي، كان بيسهيني، ويروح للفراخ بتاعتك، ويعمل الواجب
- الزوج : (بدهشة) ابن الإيه (يهم بالانصراف)
- الزوجة : رايح فين؟
- الزوج : رايح أعمل الواجب
- الزوجة : (بغضب) إنت تتلهى، وتقعدهنا (الزوج يجلس)
- جحا : (شارداً) كان نفسى أعرف من ياسميننا حكاية المونبايل، والفاكيه ده اللي كانت بتقول عليه

- جار 2 : (يدخل) يا عم إنت كل ما تشوفني تقول لى: اقلع السروال
- جار 1 : وأنا مش ح استريِّح إلا ما آخذ السروال بتاعي
- الزوجة : كملت
- جارة 1 : طب لو مش عاوز تقلعه... خليني أبص فيه من جوه
- الزوج : (ينهره) عيب مش كده، الكلام ده بره المحكمة
- القاضي : (يدخل) يا حارس، يا حارس
- جحا : الحارس راح لقصر السلطان، عشان يجيب مكتوب مولاي السلطان لجنابك
- القاضي : هو أنا ح استناه؟!
- الزوجة : آه والنبي يا جناب القاضي، أنا مستعجلة قوى
- جارة 1 : وأنا كمان
- جار 1 : وأنا كمان
- أحلام : (فتاة كفيفة تدخل المحكمة بمساعدة العكاز) يا حضرة جناب القاضي
- أحلام : (تشير بعكازها إلى جار 1)
- جار 1 : (يقوم بتوجيه العكاز نحو القاضي) جناب القاضي هناك أهوه
- أحلام : (تتجه نحو القاضي) يا حضرة جناب القاضي
- القاضي : عاوزه إيه يا ست إنتي؟ اسمك إيه الأول؟
- أحلام : اسمي أحلام
- جحا : (وقد أحس بالتشابه الواضح بين أحلام وياسمينا) لأ مش أحلام، دي ياسمينا... يا سمينا اللي سبتها هناك

- أحلام : أنا أحلام، هو إنت ح تعرّفني بنفسي؟
- جحا : لأ إنتي ياسمين، متصدقهاش يا جناب القاضي
- أحلام : أنا مش ياسمين
- جحا : لأ.. إنتي ياسمين
- جحا : بس إيه اللبس اللي إنتي لابساه ده؟
- القاضي : اسكت يا جحا
- أحلام : هو إنت جحا
- جحا : آه والله أنا جحا
- أحلام : إزيك يا جحا
- جحا : الله يسلمك، معقولة نسيّتي يا ياسمين؟
- أحلام : ياسمين تالالالالالاني!!
- جحا : أيوه ياسمين زوجة فخامة فُكهاطي الجزيرة، اللي هوه أنا
- أحلام : مش فاهمه حاجة
- جحا : طب ليه عاملة نفسك مش عارفاني؟
- القاضي : إتفضلّى معاهم يا ست أحلام
- جحا : تعالى جنبى هنا يا ياسمين
- أحلام : ياسمين تالالالالالاني!!
- جحا : (من القفص) ممكن آخذ إيديها يا جناب القاضي؟
- القاضي : خد بإيديها يا جحا، يمكن تفوقك م اللي إنت فيه
- جحا : (يخرج من القفص، ويذهب لأحلام) تعالى يا ياسمين، أنا ح أدخل القفص، وإنتي اقفى جنبى هنا

- الزوج : هو جحا إتلحس في دماغه ولا إيه؟
- جارة 1 : جحا عمره ما كان كده
- جارة 2 : عيني عليه، يظهر إنه لما نام هنا في الطّل خد لطشة برد
- : (يستقر جحا في القفص، وتقف بجانبه أحلام)
- القاضي : الست اللي عاوزه تتطلق
- الزوجة : أيوه يا جناب القاضي، أنا عاوزه أتطلق من الرجل ده
- القاضي : عملك إيه الرجل ده؟
- الزوجة : بيخونّي
- الزوج : حاشا فاشا كولا
- الزوجة : ما تعدل لسانك يا راجل وتقول حاشا وكلا
- الزوج : لأ... حاشا فاشا كولا
- القاضي : يعنى إيه؟
- الزوج : يعنى معملتش كده
- القاضي : (للزوجة) وإزاي بيخونك بقى؟
- الزوجة : مسكته متلبس
- الزوج : يا نهار إسود، إنت مسكتيني متلبس؟
- القاضي : إزاي؟
- الزوجة : كان بيهزر مع جارتنا ويغازلها
- الزوج : محصلش... محصلش
- الزوجة : لأ حصل

- القاضي : حصل فين؟ وإمتي؟ وإزاي
- الزوجة : في الحلم
- القاضي : في الحلم؟!!!
- الزوجة : أيوه في الحلم، كان سخن شوية، وفضل يخطر ف ويخرف
- القاضي : ما ينفعش تتطلقي منه، لازم يكون متلبس
- الزوج : ينصر دينك يا جناب القاضي
- الزوجة : أنا ما ليش دعوة، أنا عاوزه أطلق منه وبس
- القاضي : خلاص (للزوج) روح يا زوجها اتلبس (للزوجة) وبعدين تيجي تطلبي منه الطلاق
- الزوجة : (تصرخ) وأنا ح أسويه لحد ما يتلبس
- الزوجة : (تمسكه من ثيابه) بالساحق والماحق، والغضب المتلاحق، تمر بضيق، وتطلع من ضيق و 66 إبريق ما يبلى ريق
- الزوجة : (للقاضي) خلاص مش عاوزه أطلق يا جناب القاضي، قال إيه: استني لحد ما يتلبس، ده على جتتي، قدامي يا قسمتي ونصيبي، سلام يا جناب القاضي (تدفع زوجها، ويخرجان)
- الزوج : (وهو خارج لجارة 1) أحب البياض (لجارة 2) الصفار لأ
- جحا : (لأحلام) إزى خميس وجمعة عاملين إيه؟
- أحلام : خميس وجمعة !!

- جحا : أيوه خميس وجمعة
- أحلام : أنا أعرف خميس بس
- جحا : اللي يعرف خميس لازم يعرف جمعة، عشان خميس بعديه جمعة
- أحلام : يخيبك يا جحا
- جحا : أهى يا سمينا كانت بتقولي كده: يخيبك يا جحا
- القاضي : الست بتاعة البيض؟
- جارة 1 : أنا يا جناب القاضي
- القاضي : قولي شكوتك بسرعة، ولخصى
- جارة 1 : (مشيرة لجارة 2) الست دي عندها فراخ، وأنا عندي ديك
- القاضي : وإيه المشكلة؟
- جارة 1 : الديك اللي عندي كان بيزور الفراخ بتوعها
- القاضي : وبعدين؟
- جارة 1 : البيض بقى متكسر
- القاضي : يعنى إيه؟
- جارة 1 : متكسر يا جناب القاضي... افهمني بقى
- القاضي : (يستدرك) فهمت
- جارة 1 : تمام، يبقى أنا ليا بقى نص البيض اللي عندها
- القاضي : ما هي الدنيا مليانة ديوك، اشمعنى الديك اللي عندك بالذات، هو اللي كان بيزور الفراخ بتوعها

- جارة 1 : لأ هو الديك بتاعي
- القاضي : خلاص، نستجوب الديك ولو مجاوبش ندبحه، يا للا
روحي هاتي الديك بتاعك وتعالى
- جارة 1 : لأ أنا مش عاوزه البيض، عليه العوض فيهم (لجارة
2) اتهمّى بالبيض كله يا ختي
- جارة 2 : الحمد لله ربنا نصفني
- جارة 1 : لما أروح أديب الديك بتاعي وأحبسه، سلام يا جناب
القاضي (تخرج)
- جحا : (لأحلام) فاكرة لما قولتيلي يا ياسميننا: ياه على طعم
الوجع لما الست فينا تخسر الراجل الجدع، أهوه
الراجل الجدع، رجعلك تاني يا ياسميننا
- أحلام : جاييني جنبك عشان تقولي الكلام ده.. كنت بحسبك ح
تحكي لي طرفة من طرفك الجميلة (للقاضي) جحا
خلاص، عقله فوّت يا جناب القاضي
- جار 1 : (لجار 2) اقلع سروالي يا حرامي
- القاضي : إيه عاوزه يقلع السروال هنا؟
- جار 1 : أيوه

- القاضي : بس ده فعل فاضح
- جار 1 : ومش فعل فاضح لما ياخذ حاجة مش بتاعته؟ يا جناب القاضي، أنا طول عمرى ماشي بسرّوال مقطّع (مشيراً لمواضع في جسمه) أحط إيدي هنا، بيان جسمي من هنا (مشيراً لمواضع أخرى في جسمه) وأحط إيدي هنا بيان جسمي من هنا، ومن هنا، وهنا، وهنا، كان الولاد بيزفوني في الشوارع، ويقولوا لي: أبو سرّوال مقطّع أهوه أبو سرّوال مقطّع أهوه، لحد ما عملت قرض من بيت المال عشان أجيب سرّوال جديد، ولما جبته فضلت أمشي بيه، وأنا متقمّع كده (يقلّد حركته وهو يسيّر بزهو) لحد ما جه اللص ده، وسرقه مني يا جناب القاضي
- جار 2 : ما تصدقهوش يا جناب القاضي..ده سرّوالي
- القاضي : (لجار 1) وإيه دليلك إن السرّوال ده بتاعك؟
- جار 1 : أنا حاطط جّواه علامة
- جار 2 : وأنا كمان حاطط جّواه علامة
- القاضي : إيه هيه؟
- جار 2 : (متلعثماً) السرّوال ده فيه حبل، أول ما يتفك ينزل السرّوال على طول
- القاضي : بجد؟!
- جحا : (مشيراً لجار 2) اسمع يا.....
- جار 2 : (يذهب لجحا) علوز إيه يا جحا؟

جحا : (هامساً لجار2) بقول أحسن لك تديله السروال بتاعه
قبل ما يشوف جناب القاضي، العلامة اللي حاططها
صاحبك جَوَّاه

جار 2 : (هامساً) ما تخافش أنا شيلت العلامة

القاضي : بيقولك إيه الراجل ده يا جحا؟

جحا : بيقول لي شال العلامة اللي جوه السروال

جار 1 : مش قلت لك يا جناب القاضي، إن السروال ده بتاعي
(مهلاً) جاء الحق، وبطل الزاهق (مصححاً بتلعثم)
جاء الحق، وزهق الباطل

جار 1 : (لجار 2) اقلع السروال بتاعي يا حرامي

القاضي : (لجار 2) روح البيت، واقلع السروال، وتجييه هنا حالياً

جار 1 : أيوه عشان آخذ سروالي، وتاخذ عقابك يا حرامي

جار 2 : (لجحا) إن ما وريتك

القاضي : بيقولك إيه تاني يا جحا؟

جحا : بيقول لي هوه فيه حرامي، بيرجع سريقتة

جار 2 : (يجرى مهرولاً)

جار 1 : (يجرى خلف جار2) سروالي يا حرامي.. سروالي يا
حرامي

جحا : (ينظر إلى القاعة، فلا يوجد سوى هو وأحلام) جالك

الموت يا تارك الصلاة.. الدور عليا يا جناب القاضي

القاضي : استنى لما نشوف حكاية أحلام

جحا : أمرك يا جناب القاضي

القاضي : (لأحلام) اسمك؟

- أحلام : أحلام الكفيفة
- القاضي : أنا قلت اسمك إيه؟
- أحلام : هو ده اسمى
- القاضي : أنا علوز اسمك مش لقبك
- أحلام : مش فاكرة من كتر الناس ما بينادوني بكده.. نسيت اسمى
- القاضي : قضيتك؟
- أحلام : ما هى دي قضيتي
- القاضي : يعنى إيه؟
- أحلام : قضيتي، إن كل الناس بينادوني بأحلام الكفيفة، زى ما بينادوا، ويقولوا: فلان الأعرج، وفلانة الطرشة، وساعات بيستغنوا عن أسامينا خالص ويقولوا العميا راحت، والطرشة جت
- القاضي : كل ده مضبوط، بس إنتي بتقاضي مين بالضبط؟
- أحلام : الناس كلهم
- القاضي : الناس كلهم؟! يعنى علوزاني أجيب لك الناس كلهم وأقاضيهم وأحاسبهم هنا
- أحلام : وماله مش إنت القاضي؟
- القاضي : أيوه أنا القاضي
- أحلام : خلاص أحكم بالعدل يا جناب القاضي

القاضي : أنا هنا عشان أحكم بالعدل

أحلام : تمام.. يبقى قول للناس...إن العميا دي بتحس بغمزكم

و بتسمع همسكم، قولهم كمان لو ناقصة عين، فأنا
عندي ودان، وعندي إيدين وعندي لسان، ولو
ماعنديش حاجة خالص فكفاية إني إنسانة، وإذا كان
ربنا أخذ منى البصر، فادّانى البصيرة قولهم كمان: أنا
لا يهمني زيكم شروق الشمس ولا غروبها، ولا يهمني
الشمعة تقيد أو تنطفي عارف ليه؟ لأنني طول عمري
عايشة في الضلّمة (تضحك بمرارة) ده اللي ما
عندوش عين مش ح يشوف مناظر سيئة، واللي ما
عندوش ودان مش ح يسمع نميّة، واللي ما عندوش
رجلين مش ح يسعى للرزيلة، واللي معندوش
عقل...ح يرتاح من شرور العالم كله

أحلام : (للقاضي) إحنا عجزنا يا جناب القاضي مش بإيدينا

عجزنا ده قدرنا مش صنع إيدينا، كلنا لما نكون تحت
التراب ح نفقد كل حاجة، إنت ضامن في يوم من
الأيام ما تفقدش حاسة من حواسك؟ يبقى ليه الناس
بينادونا بإعاقتنا؟ وهو يعنى الإعاقة دى حاجة ما
حصلتش؟ ده ياما فيه ناس كتيرة بكامل حواسهم بس
معاقين تماماً، لأنهم ما مبيشوفوش الحقيقة أو يسمعوا
الصدق، أو يجروا لعمل الخير

القاضي : كلامك كله صح يا أحلام

- جحا : ولا يصح إلا الصحيح، ولا يحق إلا الحقيق
- القاضي : اسمعي يا أحلام، أنا ح أرفع كل اللي قولتيه لمولاي
السلطان، عشان يتصرف مع رعيته
- جحا : ولازم كمان تنزلي للناس يا أحلام، وأنا كمان ح أنزل
معاكي نصحيهم ونوعيهم ونفهمهم
- القاضي : وح تنزل معاها للناس بصفة إيه يا جحا؟
- جحا : (مفكراً) بصفة إيه؟ بصفة إيه؟ أه بصفة زوجها
- القاضي : زوجها !
- أحلام : إنت بتقول إيه؟
- جحا : أحلام... هل تقبليني بعلاً لك؟
- أحلام : متهاً لي... إنك قلت الكلام ده قبل كده؟ بس لمين؟
- جحا : يبقى إنتي ياسمين؟
- أحلام : لا.. أحلام
- جحا : يبقى من النهارده، ح يبقى اسمك: أحلام الياسمين
- أحلام : اسم جميل
- جحا : قلتي إيه؟ أنا مستني قرارك بصابر الفرغ، قصدي
بفارغ الصبر
- أحلام : أنا موافقة
- جحا : موافقة على إيه؟
- أحلام : على الاسم
- جحا : أنا قصدي على الجواز

- أحلام : طبعاً موافقة
- القاضي : وأنا ح أكتب الكتاب
- جارة 1 : (تدخل وخلفها جارة 2) والله ما أنا عارفة، أعمل إيه؟
أشكى لمين ولا أشكى شمال (للقاضي) إلحقني يا
جناب القاضي
- القاضي : مالك يا ست إنتي؟
- جارة 1 : الديك بتاعي راح، اختفى
- القاضي : وبتتهمي مين؟
- جارة 1 : الست دى... أصل الفراخ اللي عندها واكله دماغ
الديك اللي عندي
- جارة 2 : طب أعمل إيه بس يا جناب القاضي، أقوله: يمشى، ما
بيمشيش أقوله: يمين ما بيمشش، أقوله: شمال ما
بيمشش، وإنت عارف يا جناب القاضي إكرام الديك....
- القاضي : (مقاطعاً) دبجه
- جارة 2 : كانت على طرطوفة لساني
- القاضي : يعنى إيه؟
- جارة 2 : ده القاضي اللي بيقول يا ختي، وأنا مالي
- الزوج : (يدخل مسرعاً) الحقني يا جناب القاضي، مراتي مش
عاوزاني أنام
- القاضي : مين؟ الحاشا فاشا كولا
- الزوج : هيه بعينها

- الزوجة : (خلفه لاهثة) أبوه عشان كل يوم بيخونني مع واحدة
شكل في المنام
- الزوج : محصلش، محصلش
- الزوجة : هو إنت داري بنفسك، روح يا أخي، إلهي أشوف
فيك يوم ويكون أجازه
- جارة 1 : (تنتحي جانباً بالزوجة) مالك يا ختي كده؟ متضايقه
من الراجل كده ليه؟ إنت عارفة، جوزك ده حته
سكرة، ودمه زي الشرابات، إمبراح بالليل يا ختي..
قالنا نكتة وفضلنا نضحك، ونضحك عليها لحد ما
صحينا من النوم، يوه لحد ما صحي من النوم
- الزوجة : (تصرخ) يا لهوي، يا لهوي، هيه، هيه الأحلام، ما أنا
قولت لك: يا جناب القاضي مش عاوزاه ينام خالص
- جارة 1 : (لنفسها) الحمد لله كنا ح نروح في داهية ((بلهجة
أخرى) آه يا ميلة بختك ياني ح اعيش إزاي من غير
ديك، لازم تجيب لي ديك يا جناب القاضي
- جار 1 : (يدخل مسرعاً) الحقني يا جناب القاضي، الراجل ده
عمال يراو غني، ومش عاوز يرجع لي السروال بتاعي
- القاضي : مش عاوز ترجعه له ليه يا راجل إنت؟
- جار 2 : (بتلعثم) أصل، أصل
- القاضي : انطق، قول
- جار 1 : القاضي مش عاوز أي مبربرات
- القاضي : مبربرات؟!

- جار 1 : (لجارة 1 وملفتاً حولها) ومرّبات، وزبدات وقشطات، هوه الجميل زعلان ليه؟
- جار 1 : (متباكية) عاوزه الديك بتاعي
- الزوج : (يهمس لها من بعيد) أنا ديك أهوه، تعالى خديني
- الزوجة : بتقولها إيه يا راجل إنت؟
- الزوج : (بحزم) بقولها لازم تدور ع الديك بتاعها... (يلطفها) ينفع برضه الست تعيش من غير ديك؟
- الزوجة : ما ينفعش
- جار 1 : (لجارة 1) بقول لك إيه؟ ما ينفعش أنا بدل الديك
- جار 1 : ينفع يا خويا، أهو نطلع بحاجة، بدل الروحة والجاية للمحكمة
- جار 1 : بس أنا راجل فقير
- جار 1 : وماله خدوهم فقرا يغنيكم ربنا، ده حتى قالوها في الأمثال لو كان الفقر رجلاً ل تزوجته، وإن مشالتكش الأرض يا خويا، أشيلك فوق الدولاب
- جار 1 : على بركة الله (للقاضي) ممكن تكتب لي على الست دي يا جناب القاضي
- القاضي : يظهر إني ح أقلب لمأذن
- الزوج : (بغيط.. لجار 1) تكتب ع الست دي ! وأنا رحت فين؟
- الزوجة : إنت تقعد هنا وتتلهى
- الزوج : حاضر، حاضر يا نكبات، يا لهو بالي ده أنا حتى نسيت اسمك

- الزوجة : (برقة) اسمى فت، ت، كات
- الزوج : حاضر، حاضر، يا فتكات، بس كان نفسى أعرف
يعنى إيه فتكات؟
- الزوجة : فتكات يعنى...
- جحا : (يلاحق الزوجة ويقاطعها) فتكات من الفتك، فتك يفتك
فتكاً
- الزوجة : (تتوعد جحا) ماشي يا جحا
- الزوج : الله ينور عليك يا جحا...أشعرني كمان وكمان
- جحا : (لأحلام) أيها العشق الكويس...السلام عليكم
- أحلام : (تصافحه) وعليكم السلام ورحمة الله وبركاته
- جار 1 : خليك في الطرف أحسن يا جحا
- جحا : يا سلام ده أنا شاعر، وشاعر كبير كمان أنا قلبي م
الحب بقى لحمه مشوية، وعيني بدل ما تبكي الدمعة
بكت ملوخية
- جارة 1 : (تغيظ الزوجة) يا قلبي يا كتاكت، ياما أنت شارب م
الحب وساكت
- الزوج : (مستكماً) والقلب اشتكى من قلة الهشتكا
- الزوجة : (تنتحى به جانباً) تعالى بقى، وأنا أهشتك كويس
- جحا : يا لالا اكتب الكتاب يا جناب القاضي
- القاضي : مش قبل ما تتحاكم يا جحا
- الحارس : (يدخل) مكتوب مولاي السلطان، يا جناب القاضي
(يعطى للقاضى مطوية ، ثم لجحا) هو حكمك أسفر
على إيه يا جحا ؟

- جحا : أسفر علي أخضر
- الحارس : (للقاضي) ممكن أقرأ المکتوب يا جناب القاضي
- القاضي : بتقول إيه؟
- الحارس : بقول خطي وحش ما بعرفش أقرأ
- القاضي : (يقرأ من المطوية) كعادتي كل يوم، يرسل سموي حفظني الله ، تحيتي لرعيتي، وقراري بالإفراج عن جحا، وإعطائه خمستلاف دينار مقابل تعليم جحا لحمار السلطان القراءة والكتابة
- الجميع : يحيا العدل... يحيا العدل
- أحلام : هو إنت ح تعلّم حمار السلطان القراءة والكتابة؟
- جحا : آه
- أحلام : وهو فيه حمار بيتعلم؟
- جحا : آه، أنا (مستدركاً) قصدي أنا اللي ح أعلم الحمار
- أحلام : إزاي؟ مش فاهمة
- جحا : أنا قلت للسلطان إني ح أعلم الحمار في مدة عشرين سنة
- أحلام : وبعدين؟
- جحا : ح يكون خلال العشرين سنة دول، لإما يكون السلطان مات، لإما يكون الحمار مات، لإما أكون أنا مت
- أحلام : بعد الشر عليك يا جحا

(سـتار)

احلم يا جحا / خليك مكاني

" خليك مكاني ! "



الشخصيات

1- الأطفال المعاقون ذهنياً..:

- دعاء:
- نهال:
- أحمد:
- عبد ربه:
- حسنى: يتعامل بالإشارات، والإيحاءات، لفقدانه حاسة السمع أيضاً

2- الأصدقاء المثل.. الأطفال:

- آية:
- سمر:
- إسلام:
- مازن:
- ماهر:

3- علي: مشرف الجمعية

- أسامة: والد أمين
- وفاء: مدير الجمعية
- إيمان: والدة أمين

** ** *

المشهد الأول

(في إحدى القاعات التي يتم فيها تدريب الأطفال
ذوى الاحتياجات الخاصة)

- علي : (يقوم بتدريب الأطفال المعاقين ذهنياً، وقد بدا عليه
الإحباط لعدم استجابتهم له وذلك من خلال استعراض)
- علي : (وهو ممسكاً بعصا وخلفه سيورة) ألف
- الجميع : ألف
- علي : باء
- الجميع : باء (ينتهي الاستعراض ويقع علي ساقطاً بينهم من
شدة الإرهاق، ويتجمع حوله المعاقون ذهنياً)
- وفاء : (تدخل ثائرة) صباح الخير (يلمحها المعاقون ذهنياً
فينتحون جميعاً في إحدى جنبات المسرح — تفاجئ
بوجود "علي" ساقطاً على الأرض)
- وفاء : (لعلي)... صباح الخير يا أستاذ علي، مالك فيه إيه؟
- علي : صباح الخير (حيث نهض جالساً) أبدأ مفيش حاجة،
شوية إرهاق بس
- وفاء : طب قوم يا أستاذ علي، خضتني عليك
- علي : (حيث ينهض واقفاً) أنا بخير والحمد لله
- وفاء : إيه الأخبار؟
- علي : مش ولا بد

- وفاء : يعني إيه؟
- علي : أنا مش شايف أي تقدم، كل اللي بيحصل ده، ما هو إلا تضییع للوقت، أنا جربت معاهم كل الطرق، ومش قادر أوصل لنتیجة
- وفاء : يعني إيه؟
- علي : يا أستاذة وفاء أنا مش عاوز المكان ده، يبقى مجرد مكان يتجمع فيه الولاد دول وبس
- دعاء : (تدخل في الحوار) صح
- علي : هو إيه اللي صح؟
- دعاء : مش عارفة
- عبد ربه : أمين ما جاش، أمين بح (يجلس مهموماً)
- وفاء : زهقت يا علي؟ استسلمت ويئست في بداية طريقك؟
- علي : (بإصرار) لا، أنا ح أجرب مرة ثانية، وثالثة
- وفاء : وما تنساش أن دول موضوع رسالة الماجستير بتاعتك
- علي : بصرف النظر عن الماجستير أو غيره، دول بقوا رسالتی الحقيقية، بقوا قضيتی
- أحمد : (ممسكاً تليفونه) آلو، إسلام؟ إنت ما جتش ليه؟ أنا رحى النادي إمبراح
- (يسترسل في حديثه ويتجه بعيداً فيخفت صوته)
- وفاء : (لعلي) أحمد مسك التليفون، وعرف يتصل بصاحبه
- دعاء : (تمسك هي الأخرى بالتليفون) أيوه يا آية أنا زعلانة منك، مش ح أكلمك تاني أيوه، أنا بحبك قوى يا آية

- وفاء : ودعاء كمان، بتتصل بصاحبته، وبتزعل، وبتاخذ مواقف كمان
- عبد ربه : أمين ما جاش، أمين بح
- علي : أمين جاي، جاي يا عبد ربه
- وفاء : عبد ربه حالته بقت صعبة
- علي : أمه اتجوزت بعد وفاة أبوه، وسابته عند ناس قرايبه، استغلوه في الشحاتة، لقيته ماشي في الشارع بيقول لله
- عبد ربه : (مقلداً) لله، لله
- وفاء : وبعدين؟
- علي : أخذته البيت، وعيشته معايا، وعاملته كصديق
- وفاء : صديق؟! هايل، إنت إنسان عظيم يا علي
- علي : أبوه الله يرحمه كان صديق عزيز عليا، ووصاني عليه بس عبد ربه زعلان قوي على أمين صديقه العيان، لأن بقاله فترة طويلة ما شافهوش، هما الاتنين أصدقاء قوي
- وفاء : أصدقاء !!
- علي : صديقي يا أستاذة وفاء، أنا باقرّب منهم، باحاول أدخل لعالمهم، لو أطول آخذ كل واحد منهم صديق ليا
- وفاء : (بفرحة) صديق ! أصدقاء !!! إنت عبقرى يا أستاذ علي
- نهال : (لعللى) إنت بع، بع
- علي : (مستكماً) بعقرى يا نهال
- أحمد : (لعللى مصححاً) عبقرى

- علي : عبقرى؟! عبقرى إيه بس! وأنا ساعات كثير بحس إني
أخيب م الخيابة، بدليل إن مش لاقى حل، مش عارف
أعمل معاهم حاجة؟
- وفاء : إنت ابتديت يا أستاذ علي، قربت تحط رجلك ع
الطريق الصح
- دعاء : صح (الجميع يلتقطون منها الكلمة ويكررونها)
- علي : (لهم) هو إيه اللي صح؟ (مفكراً) أنا محتاج لطريقة
جديدة، طريقة توصلني ليهم. (لوفاء) تعرفي كثير، وأنا
بحط نفسي مطرحهم، باحاول أحس بمشاعرهم
- وفاء : (كأنها تستدرجه لشئ ما) تحط نفسك مطرحهم !!
- علي : أيوه
- وفاء : (لعلي) بجد، إنت عبقرى ونظرتي ليك ما تخيبش
- علي : إنتي بتجامليني يا أستاذة وفاء، بترفعي من معنوياتي
اطمئني أنا مش ح أياس لازم ألاقى الحل
- وفاء : (تضحك)
- الأطفال المعاقون ذهنياً (يضحكون جميعاً)
- وفاء : (للأطفال المعاقين ذهنياً، تنهرهم) بس
- علي : (لوفاء) بتضحكي علي إيه؟
- وفاء : لأنك لقيت الحل، بس مش واخد بالك
- علي : الحل !!
- وفاء : (تذكره) لو أطول آخد كل واحد فيهم صديق
- علي : مش فاهم
- وفاء : الكلام ده بياخدنا لمشروع.....

- علي : (مستكملاً) مشروع الصديق الأمثل !
- وفاء : هو ده الحل
- أحمد : (بدون فهم، ولو فاء) أيوه هو ده الحل
- علي : فعلاً هو ده الحل (مفكراً، ومعدداً) آية، سمر، إسلام
مازن، ماهر
- وفاء : مين دول؟
- علي : ح تعرفي بعدين؟
- وفاء : طب ح تعمل إيه؟
- علي : ح تشوفي بنفسك
- وفاء : وأنا واثقة فيك (تنصرف)
- عبد ربه : أمين ما جاش، أمين بح
- علي : أمين جاي، أمين جاي، يا عبد ربه
- علي : (للأطفال) ألف
- الجميع : ألف
- علي : باء
- الجميع : باء

(علي والأطفال المعاقون ذهنياً ، يستكملون الاستعراض السابق)

(إِظْلام)

** ** *

المشهد الثاني

(يدخل الأطفال المثل لقاعة تدريب الأطفال المعاقين ذهنياً، حيث أصبحت مهياً تماماً لكافة أنواع التدريب، ويبدو منها أوج موضوع على حامل، ومسرح عرائس.. وينادي الأطفال المثل على أقرانهم من المعاقين ذهنياً)
الأطفال المعاقون ذهنياً: (من الداخل) هيه، هيه
(يدخلون مسرحين، فيتجه كل صديق نحو صديقه: إسلام لأحمد وآيه لدعاء، وسمر لنهال، وماهر لحسني، ومازن لعبد ربه)

آية : (لدعاء) زعانة مني؟

دعاء : لأ

سمر : أخبرك يا نهال؟

نهال : تمام

إسلام : (لأحمد) إزيك يا أحمد

أحمد : تمام، تمام

ماهر : (يربت على كتف حسني، وحسني يبادلله الود)

مازن : إزيك يا عبد ربه

عبد ربه : (يومئ برأسه بالنفي)

مازن : ليه بس؟

عبد ربه : أمين ما جاش، أمين بح

- ماهر : (لحسني) وإنّ يا حسني؟
- حسنى : (بايماءات وإشارات تعني أنه بأحسن حال)
- سمر : هو إحنا ح نضيع الوقت في الكلام
- إسلام : كلامك صح يا سمر، تعالى يا أحمد، أنا عاوز أعلمك
كاراتيه (يبدأ إسلام في تعليم أحمد بعض مبادئ
الكاراتيه)
- آية : (لدعاء) يا لالا يا دودي، علوزين نرسم النهارده
(تصحبها إلي حيث منضدة معدة للرسم)
- سمر : (لنهال) يا لالا يا نهال، نكمل درس إمبراح (تتجه بها
إلي حيث السبورة، وتمسك القلم وتكتب) ب، أ، ب، أ
تبقي إيه؟
- نهال : بابا
- سمر : حلو خالص، يا لالا بقي اكتبها
- نهال : (تكتب بابا)
- سمر : شاطرة، يا لالا بقي، اكتبي اسمك
- نهال : (تتجه لكتابة اسمها على السبورة)
- مازن : يا لالا يا عبد ربه، نلعب سوا لعبة الأراجوز
(يصطحب مازن صديقه عبد ربه لمسرح العرائس،
وخلفهما الجميع، ثم يظهر مازن كأراجوز خلف
مسرح العرائس)
- الأراجوز : قرب، قرب، قرب أنا الأراجوز... الأراجوز... أراجوز...
اللى يجيلي قوام
أديله هدية تمام

- واضرب له ألف سلام
أنا الأراجوز... الأراجوز... أراجوز...
- سمر : والنبي يا سي أراجوز
الأراجوز : عنيا يا ستى
سمر : أنا عاوزة فستق ولوز
الأراجوز : من عنيا الجوز
آية : وأنا كمان يا سي أراجوز
الأراجوز : عنيا يا بنتي
آية : أنا عاوزة فستان أبيض على روز
الأراجوز : من ودانى الجوز
عبدربه : وأنا عاوز صاحبى أمين
الأراجوز : ويطلع مين أمين؟
عبدربه : أمين يطلع.. (مفكراً) يطلع أمين
الأراجوز : وعندك واحد أمين وصلّحه
أحمد : عيب كده يا أراجوز.. ده أمين صاحبه شهم، وجدع
إسلام : ومخلص قوى وأمين
الأراجوز : (لعبدربه) وانت مين يا ابنى؟
ماهر : ده عبدربه صاحب صاحبه
الأراجوز : (لعبدربه، وبتأثر) إنت مش عارفني يا عبدربه؟
عبدربه : إنت مين؟
الأراجوز : بص في عيني الشمال، وبص في عيني اليمين

عبد ربه : إنت مين؟
الأراجوز : أنا أمين صاحبك بس متكرر
عبد ربه : لأ متشكر
الأراجوز : بالحضن يا صاحبي
عبد ربه : لأ، ابعده عني.. ريحتك بصل وتوم
الأراجوز : معلش.. أصلى لسه قايم م النوم
عبد ربه : ابعده عني
الأراجوز : وما غسلتش سناني بقالي كام يوم... بالحضن يا صاحبي
عبد ربه : (بيتعد عنه)
أحمد : ما لكش حق يا عبد ربه
إسلام : ده أمين صاحبك، يا عبد ربه
الأراجوز : أنا أمين صاحبك من سنين
سمر وآية : أيوه يا خويا عارفين.. عارفين
عبد ربه : (هارباً) لأ.. لأ.. إنت مش أمين.. أمين ما جاش، أمين
بح
: (يدخل "علي"، ويجري إليه "عبد ربه" مهرولاً)
عبد ربه : أمين ما جاش، أمين بح
علي : (يعانق عبد ربه) بكرة ح اخذك يا عبد ربه، ونروح
نزوره في المستشفى

(إِظْلَام)

** ** *

المشهد الثالث

(المنظر عبارة عن عنبر في مستشفى... حيث يرقد أمين وتجلس بجانبه "إيمان" أمه، و"

أسامة" أبوه، وهما

في حالة من التوتر والقلق... يسمع صوت طرق ع الباب)

- إيمان : مش علوزين أي زيارة، أنا أعصابي مش مستحيلة
- أسامة : ما يصحّش كده يا إيمان (للطارق) اتفضل
- عبد ربه : (يدخل مسرعاً، ومتلهفاً نحو "أمين"، ويلقى بنفسه عليه محتضنه و"علي" خلفه) إزيك أمين، إزيك أمين
- أمين : (بصعوبة) الله يسلمك يا عبد ربه، كتر خيرك، إنك جيت تزورني
- عبد ربه : (يشد في عناق أمين) أنا بحبك أمين
- أمين : وأنا كمان يا عبد ربه
- إيمان : (باستياء — لنفسها) أنا مش عارفه الولد ده، لازق لنا في كل حنة كده ليه، في البيت، وفي النادي، وفي الشارع؟ !!
- أسامة : (مقترباً منها) بتقولي إيه؟
- إيمان : (صارخة) علوزه أعرف إيه اللي جابه هنا كمان؟
- علي : اللي جابه هنا هو حبه لأمين
- إيمان : (بغضب) واحنا مش علوزين الحب ده (بغضب أكثر) إحنا مش ناقصينه

- عبد ربه : (محتضناً أمين) سلامتك أمين.. سلامتك أمين
- أمين : (بصعوبة أكثر) الله يسلمك يا عبد ربه
- إيمان : (لعبد ربه وبغيظ مكتوم حيث تدفعه للخروج بلطف مصطنع) حبيبي إنت ممكن ترؤح دلوقتي، وتيجي بعدين
- عبد ربه : (لا يعبأ بحديثها، وغير مستوعب لموقفها، ولا يتحرك من مكانه)
- إيمان : (علي) من فضلك يا أستاذ.. أعصابي مش مستحيلة
- علي : يا مدام، أنا جبت عبد ربه عشان علوز يقف جنب صاحبه، عشان بيحبه
- إيمان : (لأسامة) من فضلك يا أسامة، كفاية اللي إحنا فيه
- علي : إحنا أسفين يا هانم
- أسامة : هدى نفسك شوية يا إيمان
- إيمان : (بتعجب واستنكار) ما هو مش أي حد يتصاحب على أمين !!
- علي : عبد ربه مش أي حد... ده صاحب أمين الروح بالروح، وبيموت فيه
- إيمان : (صارخة) ما تجيبش سيرة الموت
- علي : بعد الشر.. قصدي همه الاتنين بيحبوا بعض
- أمين : (من بعيد) كلامه صح يا ماما.. أنا وأمين بنحب بعض
- إيمان : (لأسامة) لو سمحت يا أسامة، خليه يطلع بره
- أمين : (من بعيد) لا يا ماما.. لا يا ماما
- علي : (يجذب عبد ربه) يا للا يا عبد ربه
- أمين : (مشيراً بيديه، ومنادياً لعبد ربه) ما تمشيش يا عبد ربه

- أسامة : (معتزلاً طريق علي، وعبد ربه) تمشي إزاي يا أستاذ...
- علي : علي... مشرف الجمعية اللي بيروحها عبد ربه
- أسامة : (بخبث ودهاء) أنا قلت كده برضه
- أمين : (من بعيد) تعالى يا عبد ربه
- عبد ربه : (ينصاع لأمين في تودد، وحنان، ومتجهاً نحو أمين)
أمين.. أمين
- علي : (لأسامة) أمين روحه في عبد ربه
- إيمان : (مستنكرة) عبد ربه !!
- علي : (مؤكدًا) أيوه عبد ربه
- أسامة : (ناهرًا زوجته) وبعدين معاكى ! (أمرًا) قلت لك هدى
أعصابك شوية
- أمين وعبد ربه : (كأنهما يتبادلان حديثاً بصوت خافت)
- أسامة : (لعلي) اتفضل اقعد يا أستاذ
- إيمان : أنا مش فاتحها مضيفة هنا.. الولد تعبنا زي ما أنت
شايف
- أسامة : (ينهرها بشدة) كده إنتِ زودتيها خالص
- أسامة : (يأخذها من ذراعيها، وينتحي بها جانباً) اللي إنتي
مش طايقاه ده.. هو الحل الوحيد عشان ابنك يخف
ويقوم على رجليه، عبد ربه جالنا هدية
- إيمان : مش فاهمة
- أسامة : ح أفهمك بعدين
- إيمان : لأ... دلوقتي

- أسامة : قلت بعدين.. يا لالا اعتذري للرجال... عشان ما تبوظيش
اللي في دماغي، وتحطي أعصابك في ديب فريزر
- إيمان : حاضر.. لما نشوف آخرتها
- إيمان : (متجهة لعللي) أنا أسفة يا أستاذ علي.. يظهر إن
أعصابي تعبانة شوية
- علي : وأنا مقدر الموقف.. ربنا يشفى أمين، ويعافيه
- عبد ربه : (من بعيد) يا رب.. يا رب
- علي : واضح إننا سببنا لكم قلق (ياخذ عبد ربه) أستاذن بقي
- أسامة : تبقى تيجي يا أستاذ علي
- علي : لوحدي
- إيمان : آه
- أسامة : (منبهاً لها، بغضب) إيمان
- أسامة : (لعللي وبضحكة صفراء) هيه ما تقصدش كده طبعاً
- إيمان : (ملطفة للموقف) لا تيجي إنت، وعبد ربه.. علشان
اللي يحبه أمين... لازم إحنا كمان نحبه
- أمين : شكراً، يا ماما
- علي : (لإيمان) ده من قلبك
- إيمان : أكيد
- علي : (يتجه ليأخذ عبد ربه) يا لالا يا عبد ربه
- أمين : مع السلامة، يا عبد ربه

عبد ربه : سلامة... أمين (ينصرف علي، وعبد ربه، يتأبطه)

إيمان : (لأسامة) قولي بقي... إيه اللي في دماغك

ایمان : (یتھامسان)

وأسامة

ایمان : فعلاً، یوضع سرہ...

أسامة : (مكماً) في عبد ربه (يتصافحان تأكيداً للفكرة)

(سـ تـ اـ ر)

المشهد الرابع

(يدخل علي يتفقد قاعة التدريب، ويبيدي إعجابه
بعبارات الاستحسان: برافو شاطرين، كويس، تمام..
حتي يصل لعبد ربه)

عبد ربه : أمين ما جاش، أمين بح
علي : قلت لك: أمين جاي، جاي، يا عبد ربه
أحمد : (يمارس لعبة الكاراتيه)
علي : برافو يا إسلام... أحمد مستواه اتحسن
دعاء : (مشغولة برسم لوحة)
علي : (داخلية) وادى دعاء، ابتدت ترسم كويس... برافو
علي : عليكى يا آية
علي : (لحسنى، ومشيراً إليه) امسك المنشار كويس يا حسنى
علي : (لنهال) كاتبة إيه يا نهال؟
نهال : نهال
علي : (مقاطعاً) شاطرة، يا نهال... برافو يا سمر
مازن : (مرتدياً قفازاً، ومتجهاً بعبد ربه لمسرح العرائس..
والجميع خلفه يغنون)
: أنا الأراجوز... الأرا.. أرا... جوز

: مناخيرى مقورة... وخذودى مدورة... وعيونى منورة

- إسلام : وتعالى يا هانم... تعالى يا بيه
تذكرة واحدة... بعشرة جنيه
آية : واتفرج يا سلام... واتفرج يا سلام
على فرجة تمام... ولا في الأحلام
سمر : واتفرج يا سلام... واتفرج يا سلام
على فرجة تمام... ولا في الأفلام
مازن : لا تقول لي كاني ولا ماني... ماسمعش منك آه ياني
دي لعبة جميلة وعجاني.. ومسرحنا حلو مالوش تاني
إسلام : فكرها معانا فُكيرة
آية : وكركرها بصوتك كُركيرة
سمر : وفككها بوشك كُشيرة
الجميع : (يمسكون بعبد ربه، ويغنون)
عبد ربه يا حلاوته... جاي يتمختر بشطارته
لعيب بصوابه وحركته... والكل يحلف بمهارته
عبد ربه وحكايته عن... صاحبه أمين وغلاوته
مغرم بيه وشقاوته... وكمان مجنون بصدافته
مازن : أنا الأراجوز... الأرا... أرا... جوز
علي : (يصفق) برافو عليكم، اسمع يا مازن، أنا عاوز عبد
ربه، يتعلم كويس على مسرح العرايس

- مازن : أنا فعلاً، ابتديت أعلمه
- عبد ربه : أنا أحب مسرح عرايس
- علي : تمام يا عبد ربه (للجميع) يا للا كملوا تدريباتكم
- الجميع : (ينصرفون لاستكمال التدريبات)
- أسامة : (داخلاً) أستاذ علي (يستمر تدريب الأصحاء للمعاقين)
- عبد ربه : (يتجه مسرعاً نحو أسامة) أمين ما جاش، أمين بح
- علي : وبعدين يا عبد ربه (لعبد ربه) روح هناك
- عبد ربه : (مشيراً لأسامة) بابا أمين، بابا أمين (يحاول أن يصافحه، لكنه يعرض عنه)
- علي : قلت لك، روح هناك يا عبد ربه (ينصرف عبد ربه)
- عبد ربه : (منصرفاً) أمين ما جاش، أمين بح
- علي : أمين عامل إيه ده الوقت؟
- أسامة : (بحزن) أمين خلاص
- علي : يعنى إيه؟
- أسامة : عرضت عليهم كليتي، وبعد ما عملت الفحوصات والذي منه، قالوا لي ما تنفعش، كان نفسي أديله كليتي
- علي : لا حول ولا قوة إلا بالله
- أسامة : مفيش غير أمل واحد
- علي : أمل واحد !!
- أسامة : وف إيدك إنت

علي : في إيدي أنا؟ إنت عاوز كليتي؟!
 أسامة : كليتك إنت لا
 علي : أمال كلية مين؟
 أسامة : (ينتحي به جانباً) عبد ربه
 علي : (يهم بالصياح باسم عبد ربه، ولكن أسامة يطبق على فمه)
 أسامة : (بعد أن يرفع يده من على فم علي، ثم بشيطانية) عبد ربه معاق، ومش معاق سمعياً ولا بصرياً، ده معاق ذهنيّاً
 علي : يعني ما لهوش لازمة
 أسامة : وإنت في مقتبل العمر، ومحتاج فلوس عشان تكمل رسالة الماجستير والدكتوراه وعشان تتجوز، وعبد ربه أهله بايعينه
 علي : وعرفت إزاي؟
 أسامة : زي ما عرفت إنك متكفل بيه، ومقعدّه معاك في بيتك..
 هيه، قلت إيه؟
 علي : في إيه؟
 أسامة : (يخرج شيكاً) أناح اكتب لك المبلغ ده، تمثني بيه نفسك (يكتب في الشيك)
 علي : (وكانه يوافقه على فكرته) ليه؟ هي الكلية مش مسعرة!!

- أسامة : مسعرة طبعاً (يهمس إليه) اسمع، اللي زي دول أهاليهم
ما ح يصدقوا يخلصوا منهم، يعنى مش ح يسببوا لنا
أي إزعاج، ولا ح نتعرض لسين أو جيم (يضحك) أو
نون (يضحك أكثر) ده حتى ممكن أهاليهم بيعتوا لنا
خطابات شكر كمان
- : (بجدية) ده أنا حتى أعرف لك كمان ناس، ممكن تاخذ
الشروة دي كلها على بعض
- علي : ناس؟! :
أسامة : تجار!! :
أسامة : قطع غيار، قطع غيار بني آدميين (مشيراً للأطفال)
يعني لو تحب تسرب العيال دول واحد ورا واحد، ح
يبقي رصيدك في البنوك فوق ما تتخيل
- علي : طب ما دمت تعرف التجار دول، جايلي أنا ليه؟ وليه
أنا بالذات؟! :
أسامة : أنا قلت الجار أولي بالشفعة
- علي : إنت اعتقدت، إني ممكن آخذ أي مبلغ
أحمد : (يطلق صيحة من صيحات الكاراتيه)
أسامة : (وقد بهت تماماً) أنا تحت أمرك
- عبد ربه : (يتجه لأسامة) أمين ما جاش، أمين بح
علي : (لعبد ربه غاضباً) قلت لك روح هناك يا عبد ربه
أسامة : ليه بس تشخط فيه، دا عبد ربه، ولد ظريف ولطيف



- عبد ربه : أمين ما جاش، أمين بح
- علي : (وقد نفذ صبره).. روح هناك يا عبد ربه
- أسامة : (لعلي) عبد ربه ما جاش، عبد ربه بح (يضحك، ثم يقطع الشيك الذي معه ويعطيه شيكاً آخر) خد الشيك ده، واكتب فيه الرقم اللي أنتت عاوزة، الرقم اللي يعدل دماغك، وأنا عارفك إنك إنسان قنوع (يعطيه الشيك، فيرفض على أن يأخذه) إيه مش عاوز تكتب؟ طيب أنا ح أكتب لك المبلغ... اللي أنا حاسس إنك عاوزة، و ح أجيلك تاني، عشان تقولي ردك (يكتب رقماً، ثم يوقع الشيك ويتركه مطوياً على إحدى الموائد بالقاعة)
- علي : (بشروء) أنا
- أسامة : الشيك أهوه (مشيراً له) خليه معاك عشان يساعدك ع التفكير، مش عاوز ردك ده الوقت، متعودش نفسك تاخذ قرار قبل ما تفكر، باي (يخرج)
- عبد ربه : (لعلي) أمين ما جاش، أمين بح
- عبد ربه : (يلاحق علي في كل مكان يتجه إليه، كأنه يحاصره ويمنع عنه تفكيره) أمين ما جاش، أمين بح
- علي : (يمسك عبد ربه من يديه) عبد ربه إنت صاحبتي وحببي ولازم أدافع عنك... فاهمني؟
- ماهر : (يدخل حاملاً بعض اللعب) سلام عليكم
- الجميع : سلام ورحمة الله



: اتأخرت ليه يا ماهر؟

علي

: اتأخرت ليه يا ماهر؟

الجميع

: كنت باشتري حبة حاجات عشان عيد ميلاد حسني

ماهر

: أه صحيح، حسني أهله بيخلّوه بره البيت كل سنة

علي

عشان بيحتفلوا بعيد ميلاد أخوه التوأم السليم، أما هو

لا، لكن إحنا ح نحتفل هنا بعيد ميلاد حسني (مشيراً

لمازن) جدع يا ماهر (الجميع يجهزون القاعة للاحتفال

بعيد ميلاد حسني)

: يا للا غنوا معايا

علي

(استعراض عيد ميلاد)

(إظلام)

** ** *

المشهد الخامس

(نفس المنظر، وقد بدت عليه نواتج تدريب الأطفال الأسوياء للأطفال المعاقين ذهنياً، وشملت هذه النواتج لوحات فنية مختلفة، وبعض المشغولات، والمنظر به أوج للتدريب في إحدى جنبات المسرح، ومسرح عرائس في عمق المسرح)

علي : (داخلاً، وممسكاً بالشيك) يعنى الرقم المكتوب في الشيك ده، يتحل معاه جميع مشاكل المادية (لنفسه) المسألة محتاجة إنني أغمض عنيا، وأقتل الضمير اللي جوايا، وأدوس على كل القيم والمبادئ والمثل

صوت : آه م الضمير لما يبقى له ضفر تخين وناب، آه م الضمير لما يتغرز في أحلام النفوس المؤمنة، آه من الضمير اللي راح ندبحة ونريحه، آه من قسوة القلوب اللي راح تصبح تابوت، ما يهمناش غير الوصول فوق كل شئ

("علي" كأنه يجسد التأوهات السابقة التي تحيله لانهيار كامل)

صوت : جوانا ديب، جوانا غول ("علي" وكأنه قد أفاق على صحوه ضميره)

علي : نسيت يا علي، عبد ربه لما حضنته، وقلت له مش ح اسبيك يا عبد ربه: ح ادافع عنك، لكن لأ (بقوة وحزم) مش ح اتخلّى عنك، مش ح اتخلّى عنك يا عبد ربه (يقطع الشك ويلقي به على الأرض)

- أسامة : (داخلاً ومصفقاً) برافو، مشهد جميل، ومؤثر جداً
- كوبس إني مسكت نفسي بالعافية، كنت على وشك إني أعيط، إنت ممثل هايل (أسامة يلح الجدية والرفض التام في عيني "علي") أفهم من كده إنك رفضت مفيش مشكلة، بس لو فتحت بقبك ح تبقي إنت الجاني على نفسك وعلى غيرك
- وفاء : (داخلة) سلام عليكم
- علي : (لا يرد)
- أسامة : أهلاً، إزاي حضرتك يا وفاء هانم
- علي : (يرد بتلعثم) دا
- أسامة : (مقاطعاً) أنا راجل أعمال، وجيت أتبرع للجمعية والأستاذ علي رفض وقطع الشيك، زي ما حضرتك شايفه كده (مشيراً للشيك المقطع والملقي على الأرض)
- وفاء : ليه كده يا علي؟ وليه ما قتلتيش؟، مش أنا برضه مديرة الجمعية، والمسئولة عن كل شئ هنا
- أسامة : أوعدك لو الأستاذ علي نفذ المشروع اللي بينا، ح ابعت لك شيك محترم، محترم قوي، عن إذنك يا وفاء هانم
- وفاء : (لعلي) مشروع بينكم (لأسامة) تبعت لي شيك محترم !! أنا مش فاهمة !!
- أسامة : وفاء هانم ...
- وفاء : (تقاطعها) المسألة مش مسألة فلوس، المسألة مسألة ...
- أسامة : (مقاطعاً) عن إذنك يا هانم، انتشرت قوي بمعرفة حضرتك (يخرج)

- وفاء : (لعلي) ففهمني إيه الحكاية بالظبط؟
- علي : أفهمك.. بس بينا ع المكتب (يخرجان)
- إسلام : (داخلاً) يا سمر، يا آية، يا ماهر، يا مازن (يدخل المنادي عليهم تباعاً)
- سمر : اتأخرت ليه يا إسلام؟
- إسلام : ما أنتم عارفين، كنت باحجز أتوبيس الرحلة لأصدقائنا، طمنوني إيه الأخبار؟
- آية : الأخبار جوه هنا.. إنت عارفها، أما الأخبار بره، أنا ابتديت أخذ دعاء معايا في مرسوم كبير، والناس هناك اتبسطوا قوي من رسوماتها
- إسلام : جميل، وأنا كمان أخذت أحمد معايا النادي، وابتدا يتدرب معايا كاراتيه
- أحمد : (يؤدي بعض تدريبات الكاراتيه)
- إسلام : ومش كده وبس، ده أنا بوديه الورشة بتاعة بابا ..
- عشان يتعلم النجارة
- سمر : وأنا ابتديت أعلم "نهال" شغل الإبرة، وماما وعدتني
- تيجي هنا، علشان تعلم كل اللي غاويين خياطة
- مازن : و"عبد ربه" ابتدا يستخدم صوته، وحركات إيديه، في مسرح العرايس
- إسلام : تمام قوى (للجميع) وما تنسوش يا جماعة إن حفلة الجمعية قربت، يا للا يا "مازن"، نادي على الأستاذ "علي"

مازن : (ينادي) يا أستاذ علي، يا أستاذ علي (يخرج، ثم يدخل
الأطفال المعاقون ذهنياً، عدا عبد ربه وحسني)

الأطفال المعاقون ذهنياً : السلام عليكم

آية : (تأخذ دعاء للأورج) يا لالا، يا دعاء سمّعينا اللي
اتعلمتيه على الأورج إمبراح (نسمع صوت عزف
أغنية)

نهال : (حاملة لبعض المشغولات)

سمر : (لنهال) وريني كده الشغل اللي عملتيه ده.. الله جميل
خالص يالالا بقي يا نهال يا حبيبتى تعالى ناخذ حبة
مسائل حساب (تتجه إلي السبورة)

سمر : (قبل أن تكتب.. ينكسر فجأة حامل السبورة) حامل
السبورة اتكسر

أحمد : استني أنا ح اصلحه (يخرج)

حسنى : (يأتي وقد حمل معه فرشاة، وكأنه يدهن بها)

إسلام : بتعمل إيه يا حسني؟

ماهر : حسني عاوز يقول لكم إنه اتعلم الدهان

إسلام : ومين علمه؟

ماهر : أنا، دي مفاجأة حبيت أوريها لكم

إسلام : كل اللي عملناه ده بفضل توجيهات الأستاذ علي

ماهر : وإرشادات الأستاذة وفاء

علي : (يدخل) سلام عليكم

الجميع : وعليكم السلام



أحمد : (يأتي مسرعاً حاملاً الجاكوش متجهاً للحامل المكسور)
علي : إنت ح تعمل إيه؟
أحمد : ح أصلح السبورة
علي : هايل (ينظر فلا يجد "عبد ربه"، يصرخ بأعلى صوته) "عبد ربه" فين؟! دوّروا كلكم على عبد ربه يا أستاذة "وفاء" يا أستاذة "وفاء"، "عبد ربه" مش موجود (يحدث حالة توتر وقلق)
وفاء : (تأتي مهرولة) فيه إيه؟ فيه إيه؟
علي : عبد ربه اختفى، اتخطف يا أستاذة وفاء، وأنا عارف مين اللي خطفه
وفاء : بينا ندوّر عليه الأول، يمكن نلاقه هنا، ولا هناك (يخرجون جميعاً)
(إضاءة على مسرح العرائس، حيث يظهر عبد ربه مرتدياً قفازاً فى كل يد)
عروسة : (وكانها في مركب.. حيث الأمواج شديدة ومتلاطمة)
أمين : الموج شديد يا عبد به.. اسحب المركب بالحبل، المركب بتدخل جوه.. والموج عالي.. شد المركب يا عبد ربه(صارخاً) أنا بأقع م المركب... الحقني يا عبد ربه
عروسة عبد ربه : حاضر.. حاضر أمين
عروسة أمين : الحبل اتقطع يا عبد ربه، المركب بتتطّوح يمين وشمال.. المركب بتغرق... وأنا باغرق.. أنا بموووووت

(إضاءة.. يخرج عبد ربه منسحباً من مسرح
العرائس، وفي كلتا يديه قفاز — تتجه دعاء من مسرح
العرائس فترى "عبد ربه" فتتهلل فرحاً)

- دعاء : عبد ربه أهوه، عبد ربه أهوه
- الجميع : (يأتون خلفها، فيرونه، ويهللون بفرح شديد، ويعانقونه)
- عبد ربه : أمين ما جاش، أمين بح
- دعاء : عبد ربه كان مستخبي في مسرح العرائس، مستني
أمين، المكان ده بيحب يستخبي فيه
- عبد ربه : أمين ما جاش، أمين بح
- أسامة : (يدخل.. لعبد ربه) أمين بح، بح يا عبد ربه
- علي : يعني إيه، أستاذ أسامة !!!
- أسامة : (باكياً) أمين مات، مات
- عبد ربه : (يستشعر موت أمين) أمين ما جاش، أمين بح
- عبد ربه : (يجهش بالبكاء)
- أسامة : (محتضناً عبد ربه) سامحنى يا عبد ربه، لو كنت
أعرف إنك بتحب أمين بالشكل ده، مكنتش فكرت أبداً
إنى.....(ينفجر باكياً)
- علي : حتى لو عبد ربه مكنش بيحب أمين.. ترضى إن ابنك
يتعمل فيه كده؟ ما همه دول برضه زي ولادنا
- أسامة : كلامك صح، بس أمين خلاص مات (مسترسلاً في
بكائه)
- علي : لاحول ولا قوة إلا بالله

- أسامة : (لعبد ربه) حقك عليا يا عبد ربه، حقكم عليا كلكم، أنا
ح اعمل لكم أكبر مركز تأهيل، ح أحط كل ثروتي
تحت رجلكم
- عبد ربه : أمين ما جاش، أمين بح
- أسامة : (لوفاء) أمين حكي لي عن مشروعاتكم العظيمة، مشروع
الصدق الأمثل، أنا معاكم، لأن أمين كان علوز بيبقي
معاكم (يخرج) أمين بح بح يا عبد ربه
- وفاء : (للجميع وبخزن) الفاتحة على روح أمين (وباكية)
ياللا يا جماعة استعدوا عشان نعمل أول بروفة لعرض
جمعيتنا، يا للا نعمل عرضنا على روح أمين
- عبد ربه : أمين ما جاش، أمين بح
- وفاء : (لعلی) إنت عظیم یا أستاذ علي
- علي : وانتی کمان یا أستاذة وفاء، علمتینا معنی الوفاء
علمتینا معنی العطاء
- وفاء : یا للا یا ولاد، یا للی نعمل بروفة
- علي : یا للا یا أولاد، ح اعد لحد عشرة، وانتم تجهزوا واحد
اثنين، ثلاثة.. خلاص؟

الجميع : لسه
علي : خلاص؟
الجميع : لسه
علي : خلاويص؟
الجميع : لسه.....

(استعراض النهاية.. يبدأ حزيناً ثم ما يلبث أن يصبح مبهجاً)

(ستار)

** ** *



المؤلف فى سطور

- مواليد محافظة القاهرة
- حاصل على بكالوريوس علوم وتربية
- حاصل على دبلوم المعهد العالي للنقد الفني بتقدير جيد جداً
- موجه عام التربية المسرحية بمديرية التربية والتعليم بالإسماعيلية
- ممثل بالفرقة القومية المسرحية بالإسماعيلية، وعضو مؤسس لها
- مؤلف ومخرج مسرحي " أطفال "
- _____ مارس الإخراج المسرحي للثقافة والجامعة ومركز الإعلام ولطلائع الشباب والرياضة ولجمعيات متحدى الإعاقة البصرية والذهنية وغيرها.
- عضو اتحاد كتاب مصر
- عضو نادى الأدب بقصر ثقافة الاسماعيلية ومحاضر مركزى
- مشرف نادى أدب الطفل بقصر ثقافة الإسماعيلية
- مشرف فنى لإقليم القناة وسيناء الثقافى لمسرح الجرن
- _____ حصل على دورات تدريبية متخصصة في مجال التربية المسرحية ودورة تدريب رؤساء وقادة التربية المسرحية بتقدير (امتياز) من إدارة التربية المسرحية بوزارة التربية والتعليم
- _____ اجتاز الورش التدريبية لمدرّبي الشعب المسرحية بإدارات الطلائع بمديريات الشباب والرياضة، والورش التدريبية لجريدة مسرحنا، وورش العمل حول إنتاج المسرحيات ذات الفصل الواحد من وزارة الإعلام.
- اجتاز الورشة التكوينية الأولى للفريق المحورى للمسرح والخاصة بتطوير المسرح المدرسى فى الوطن العربى بدعوة من الهيئة العربية للمسرح بدولة الإمارات - الشارقة - عام 2015
- قدم ما يقرب من 76 عملاً مسرحياً للمسرح المدرسى ما بين تأليف وإعداد وإخراج
- قام ببطولة مسلسل " الشهيد الحى " وكتابة مسلسل " اعمل الصح " لإذاعة القناة
- حصل على جائزة أحسن مخرج وأحسن عرض فى المهرجان المسرحى الأول لمسرح الطفل للهيئة العامة لقصور الثقافة عن مسرحية " قمر الحواديث "

_____ حصل على كأس الجمهورية للتربية المسرحية عن مسرحية " مشوار الألف ميل " تأليفاً وإخراجاً

_____ حصل علي (الحصان الذهبي ودرع الإغاثة الإسلامية وشهادة تقدير وميدالية ذهبية) من المهرجان الفني السابع للطفل المعاق ذهنيًا لعام 2013، لتقديم مسرحية (الصديق الأمل أو خليك مكاني) تأليفاً وإخراجاً.

_____ حصل على المركز الأول في المسابقة الدولية للمدارس والتي نظمها "المركز الثقافي البريطاني" ومسابقة "IEARN" التابعة للسفارة الأمريكية عن مونودراما " حلم ولا علم " — أصدر كتابه الأول " زيارة لمدينة الأحلام " وهو يضم خمس مسرحيات للطفل — توزيع جريدة الجمهورية، وأصدر كتابه الثاني " عرايس قماش " وهو يضم أربع مسرحيات للطفل — إصدار الهيئة العامة لقصور الثقافة، وكتاب الثالث "حيوانات لكن !! " وكتاب الرابع " لعب x لعب " لمسرح الطفل

_____ نشرت له جريدة مسرحنا ومجلة المرجان ومجلة المسرح ومجلة الثقافة الجديدة: بعض المؤلفات المسرحية والمقالات النقدية، والقصص القصيرة.

_____ حصل على المركز الأول في المسابقة البحثية لمسرحيات الفصل الواحد لإقليم القناة وسيناء الثقافي بمونودراما " ضمير امرأة ".

_____ حصل على جائزة أحسن تمثيل على مستوى الجامعات عن مسرحية " الملوك يدخلون القرية " والتي قدمت من كلية التربية جامعة قناة السويس.

_____ حصل على جائزة التميز في التأليف المسرحي عن مونودراما " فل يا فل " من مهرجان الإسكندرية الإقليمي لمسرح الغرفة " الدورة الأولى " مسرح بره العلبة

_____ فاز بالمركز الثالث في مسابقة العاملين بالتربية والتعليم في مسرحية المناهج بنص " مشوار الألف ميل"، وحصل على درع الهيئة العامة لقصور الثقافة، وشهادة تقدير، وطبع النص في كتاب " مسرحيات منهجية " إصدار الهيئة العامة لقصور الثقافة.

--- فاز بالجائزة الخاصة بالمنتدى الثقافي للأصالة والمعاصرة " جائزة الأدبية /سعدية العادلي " عن مجموعة مسرحيات للطفل "استمروا — عرايس قماش — مؤثرات صوتية — كوكب آخر — خليك مكاني "

— حصل على المركز الأول فى مسابقة "أفضل تعبير عن كتاب " والتي نظمتها مكتبات مصر العامة بتقديم مسرحية " رحلة "من تأليفه

- حصل على منحة التفرغ لوزارة الثقافة عن مشروع " مسرحيات من خط الكنال"

— حصل على لقب "فارس الإبداع العربى " وفاز بالمركز الأول مكرر فى مسابقة "فارس الإبداع العربى " وذلك فى مجال أدب الطفل عن كتاب: لعب x لعب "

- شارك فى أعمال المؤتمر القومى للمسرح لعام 2013، وفى المؤتمر السنوى الثالث والخامس لمركز توثيق وبحوث أدب الطفل، وفى مؤتمر مسرح الطفل والتنمية فى عالم متغير بالنقابة العامة لاتحاد كتاب مصر، وفى المؤتمر العلمى الخامس عشر والسادس عشر بجامعة حلوان، وذلك بأوراق بحثية.

بريد أليكترونى: Magdymareei131@gmail.com

** ** *

الفهرس

2.....	بطاقة الكتاب
3.....	اهداء
4.....	الحادث والمتغير في نصيِّ عالم الإعاقة
10.....	صبغة جديدة لمسرح ذوى الإعاقة –
13.....	" احلم يا جحا "
91.....	" خليك مكاني ! "
122.....	المؤلف فى سطور
125.....	الفهرس
